



Služba Općinskog načelnika i  
Općinskog vijeća

Broj: 02-04-2-1632/21

Datum, 23.09.2021. godine

### Z A P I S N I K

sa 8. redovne sjednice Općinskog vijeća Maglaj  
održane dana 23.09.2021. godine u 9:00 sati u Sali Općinskog vijeća  
JU Dom kulture «Edhem Mulabdić» Maglaj

**Predsjedavajuća Svjetlana Zamboni-Radovanović**, na osnovu člana 59. Poslovnika o radu Općinskog vijeća Maglaj, zaključaka Kolegija od 16.09.2021.godine, te Programa rada Općinskog vijeća za 2021. godinu, otvaram 8.redovnu sjednicu Općinskog vijeća.

Na današnju sjednicu pozvani su vijećnici iz parlamentarnih političkih stranaka: SDP, SDA, A-SDA,SBB, DF, HDZ BIH i NBL.

Poziv na sjednicu dostavljeni su OSCE terenskom uredu u Travnik, te sredstvima informisanja koji prate rad današnje sjednice Općinskog vijeća.

Pozvan je Načelnik općine, rukovodioci općinskih Službi, Općinska pravobraniteljica, kao i predstavnici čiji materijali će biti razmatrani na današnjoj sjednici Općinskog vijeća.

Na sjednicu su pozvani i zastupnik u Domu naroda gospodin Jasminko Kapić, te zastupnica u Skupštini ZDK gospođa Emira Drnda-Čičeklić.

Sve vas srdačno pozdravljam i pozivam da svako na sebi svojstven način, odamo dužnu počast onima koji su svoje živote ugradili u zemlju, domovinu nam Bosnu i Hercegovinu i svim žrtvama rata.

Zamolila bih predstavnika Službe Općinskog načelnika i Općinskog vijeća da prozivkom vijećnika utvrdimo broj vijećnika na 8. redovnoj sjednici Općinskog vijeća.

Konstatujemo da današnjoj sjednici Općinskog vijeća prisustvuje **24 vijećnika**.

Odsutan je vijećnik Maid Suljaković uz prethodnu najavu.

Konstatujem da Općinsko vijeće može punovažno raditi i odlučivati i donositi odluke, zaključke i rješenja, ovim je ispoštovan član 88. Poslovnika o radu Općinskog vijeća Maglaj.

Na današnjoj sjednici izvršit ćemo i verifikaciju Zapisnika sa 7. redovne sjednice Općinskog vijeća.

Da li ima primjedbi na dostavljeni Zapisnik?Gospodin Kusur, izvolite.

**Vijećnik Eldis Kusur:** Ja vas sve selamim i pozdravljam. Zaželio bih dobrodošlicu našoj predsjedavajućoj, nije je bilo na dvije sjednice. Zapisnik sa 7. redovne sjednice Općinskog vijeća, nadam se da ste čitali i u istom je niz grešaka. Kad se krene od 14. tačke dnevnog reda, miješaju se stalno slova č.ć.đ. Greške u preizmenima. U tački 6. Prijedlog Odluke o naknadi troškova izdavanje urbanističke i građevinske dokumentacije, znači piše na kraju: “konstatujem da je prijedlog gospodina Osmića nije dobio većinu“, znači je ovdje je višak, znači to je greška prilikom kucanja. Ima niz grešaka znači u samom zapisniku.

**Predsjedavajuća Svjetlana Zamboni- Radovanović;** govorite o pravopisu ili o zaključcima?

**Eldis Kusur:** pravopisne greške. Ovdje sam samo skrenuo pažnju, da nije ovaj dobro formulisan, ovaj zaključak. Od tačke 14.počinju te gramatičke greške. Ja ću ovako znači u tački, prilikom obraćanja dopredsjedavajuće Aide Bašić, piše vijećnici. Znači grešaka niz ima i skrenuo bih

pažnju zapisničarima. Ja znam da se ne može sve to ukomponovati, ali da prilikom pisanja, da stvarno ovo...evo konkretno kod našeg komandira policije, ne piše Alen Mušić, nego Alen Musić. Kod našeg kolege i predsjednika Kluba SDP-a ne piše Mešić, nego Mešič. Ako neko nekada bude čitao ovaj Zapisnik, smijati će se i reći kako smo usvojili nešto, a nismo ga ni pročitali. Kod obraćanja znači komandira policije gospodina Alena Mušića, to je tačka 15.stanje o bezbjednosti, znači ima , ali neću sada detaljno.

**Predsjedavajuća Svjetlana Zamboni -Radovanović;** ne morate na pravopis više ukazivati.

**Eldis Kusun;**samo da skrenem pažnju, ovaj molim, nije praksa ili jeste praksa u predhodnim zapisnicima nije bilo tako, kada je riječ, evo KJD skraćena krivična djela, neko ne zna možda da je to krivično djelo. Da se skraćena informacija se stavlja znači inf.da se piše puno informacija. Ovaj, tako da sugerišem evo ja nisam nikad govorio, evo konkretno kod mene Žepću, mogućnost itd., itd. i da se u narednom periodu onaj otklone ove greške i da se doslovno, decidno u zapisniku vodi računa o izgovaranju. Eto to je to.

**Predsjedavajuća Svjetlana Zamboni -Radovanović;** zato i radimo verifikaciju Zapisnika. Sve pravopisne greške bit će naravno otklonjene. Zato i ukazujemo na moguće pogreške, ali prije nego se objavi ovaj Zapisnik, odnosno verifikuje i zvanično objavi on uvijek bude pregledan. Gospodin Galijašević, izvolite.

**Vijećnik Firuz Galijašević;** pozdravljam sve prisutne. U tački 7. stoji da je glasalo protiv Elvir Vehabović, a isto tako se navodi da je vijećnik Elvir Vehabović bio i uzdržan u istoj tački, a nema vijećnika Ferić Hajrudina, ne nalazi se na tom, da je uopšte glasao, a maloprije toga je navedeno vijećnik Hajrudin Ferić, prisutan. To je prva stvar. Druga stvar je u mom izlaganju iz tačke 8. U mom izlaganju stoji pa ću samo pročitati zadnji dio mog izlaganja:“ ako želiš nešto da usvojiš, napravi radnu grupu ili komisiju“, nisam tako rekao i dogovorili smo, to će biti ispravljeno. Ja sam rekao ako želiš nešto da usporiš. I na sljedećem mom izlaganju isto tako stoji riječ đaba, ja nikad nisam rekao đaba , meni to smeta, ja kažem džaba .Hvala.

**Predsjedavajuća Svjetlana Zamboni -Radovanović;** hvala lijepo.da li ima još? Ja vas molim za malo pažnje, dakle što se tiče pravopisnih grešaka one će u Zapisniku svakako biti otklonjene, ali koliko sam shvatila vezano za zaključke bila je samo jedna primjedba. Te evo uz ove sugestije koje su iznesene, da li ste za verifikaciju Zapisnika sa predhodne sjednice , uvažavajući naravno sve sugestije. Ko je za ? Protiv? Šta ste protiv ispravke ovih pogrešaka? De samo da se dogovorimo. Predložili ste ispravke, dakle predlažem da usvojimo Zapisnik sa svim ispravkama na koje ste ukazali. Još jednom, ko je za verifikaciju Zapisnika uvažavajući sve iznesene sugestije i ispravke na koje ste ukazali. Jednoglasno, hvala lijepo.Odnosno protiv, uzdržan nema niko.

Otvaram raspravu po pitanju dnevnog reda. Nema diskusije, a u tom smislu ja sazivam kratko Kolegij, pet minuta jer imamo jedan materijal koji je hitno dostavljen na Kolegij, odnosno na Općinsko vijeće, pa da vidimo samo ako mognemo i to uvrstiti na današnju sjednicu. Molim? Ko se javio za riječ? Ja vas nisam vidjela, ali molim eto predsjednika Kluba da ukaže da mu se vijećnik javio za riječ, jer ja nisam vidjela da ste se javili za riječ. Govorite o dnevnom redu. Evo mi sada Kolegij imamo, pa ćete se javiti za riječ. Mi prvo imamo Kolegij. Imate predsjednika Kluba pa neka kaže to što ste vi htjeli. Zamolila bih predsjednike Klubova nakon ove pauze da iznesu stavove po prijedlogu proširenja dnevnog reda. Izvolite gospodin Mešić.

**Vijećnik Mirza Mešić;** pozdravljam sve prisutne. Ovako, na ovom kratkom Kolegiju znači, dvije tačke dnevnog reda. Poslije će vjerujem iznijeti predsjedavajuća koja se odnosi na Komunalno, pošto je već rečeno za izradu Statuta, dopunu Statuta i tačka koja je bila na Kolegiju, pa je bila skinuta zbog određenih problema, međutim problemi su riješeni što se tiče Službe i svih imovinsko -pravnih odnosa, ponovno je vraćena, a odnosi se na Kopice, na spomen česmu. Što se nas tiče, mi smo za proširenje dnevnog reda, za te dvije tačke.

**Predsjedavajuća Svjetlana Zamboni-Radovanović;** hvala lijepo. Klub SDA. Vi ćete samo glasati. Izvolite, gospodin Bešić.

**Vijećnik Mustafa Bešić;** evo i ja vas sve selamim i pozdravljam pošto izlazim prvi put. Drago mi je što će se ova tačka dnevnog reda naći na današnjoj sjednici. Imao sam i ja kontakata i poziva od

dosta ljudi iz Kopica gdje su tražili da se vrati. Hvala Službi koja je riješila, regulisala sve ovo da dođe, a evo i Vijeće će propratiti akobogda. Eto toliko, hvala.

**Predsjedavajuća Svjetlana Zamboni-Radovanović;** hvala lijepo. To je to. Evo idemo dakle prije svega predlažem proširenje dnevnog reda za dvije dostavljene tačke. Jedna je **Prijedlog Odluke o dopunama Statuta KJD d.o.o. Maglaj** i druga je **Prijedlog Odluke o davanju saglasnosti MZ Kopice za izgradnju spomen česme, na dijelu k.č.broj 1367 KO Kopice**. Ko je za proširenje dnevnog reda za ove dvije tačke?

**GLASALO ZA :** Svjetlana Zamboni -Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Mustafa Bešić (SBB), Elvir Vehabović ( NBL) Hajrudin Fermić(DF), Pero Mamić(HDZ BH).

**GLASALO PROTIV:** Adis Abdurahmanović, Jasmin Begić, Mirsad Bejzić, Safet Jašić, Eldis Kusur, Edin Osmić, Eldin Pehrat, Edin Salatović ( SDA).

Konstatujem da se usvaja prijedlog za proširenje dnevnog reda za ove dvije tačke.

U skladu sa ovim, nismo razgovarali gdje da smjestimo ove tačke dnevnog reda, pa evo da ih ostavimo kao posljednje ako se slažete. Nakon svih materijala koji su dostavljeni ranije. Tako da imate vremena da se još s njima pozabavite u toku sjednice. Na osnovu iznesenog pročitat ću prijedlog za današnji dnevni red sa ovim proširenjem.

#### **DNEVNI RED**

**1.-Prijedlog Odluke o usvajanju djelimične Izmjene Regulacionog plana „Liješnica“ Poslovno radne zone Liješnica;**

**2.-Prijedlog Odluke o usvajanju djelimične Izmjene Regulacionog plana „Kosova“;**

**3.- Prijedlog Odluke o gubitku statusa javnog dobra u općoj upotrebi KO Kosova;**

**4.-Prijedlog Odluke o gubitku statusa javnog dobra u općoj upotrebi KO Maglaj;**

**5.-Prijedlog Odluke o kupovini zemljišta;**

**6.-Nacrt Odluke o usvajanju djelimične izmjene Regulacionog plana „Centar Maglaj-sjeverni dio“;**

**7.- Nacrt Odluke o usvajanju Nacrta djelimične Izmjene Regulacionog plana „ Novi Šeher“;**

**8.- Prijedlog Odluke o izmjenama i dopunama Poslovnika o radu Općinskog vijeća Maglaj ;**

**9.- Odluka o davanju saglasnosti za konačno imenovanje direktora JU Dom kulture „Edhem Mulabdić“;**

**10.-Prijedlog Rješenja o utvrđivanju prava svojine u korist Gorčinović Radovana iz Misurića, Maglaj kao graditelja garaže na građevinskom zemljištu kojim raspolaže Općina Maglaj;**

**11.-Prijedlog Odluke za dodjelu studentskih stipendija za studente Općine Maglaj za studentsku 2020/2021 godinu;**

**12.- .-Prijedlog Kriterija za dodjelu studentskih stipendija za studente Općine Maglaj za studentsku 2020/2021 godinu;**

**13.- Informacija o stanju i funkcionisanju MZ-a na području Općine Maglaj;**

**14.- Informacija o stanju obrta, malog i srednjeg poduzetništva na općini Maglaj.**

**15.- Prijedlog Odluke o dopunama Statuta Komunalnog javnog društva d.o.o. Maglaj ;**

**16.- Prijedlog Odluke o davanju saglasnosti MZ Kopice za izgradnju spomen česme na dijelu k.č .br. 1367 KO Kopice;**

Ko je za ? Protiv? Rezultat je isti, znači 16 vijećnika glasalo za, 8 protiv.

**GLASALO ZA :** Svjetlana Zamboni -Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Mustafa Bešić (SBB), Elvir Vehabović ( NBL) Hajrudin Fermić(DF), Pero Mamić(HDZ BH).

**GLASALO PROTIV:** Adis Abdurahmanović, Jasmin Begić, Mirsad Bežić, Safet Jašić, Eldis Kusur, Edin Osmić, Eldin Pehrat, Edin Salatović ( SDA).  
Hvala lijepo. Prelazimo na prvu tačku dnevnog reda. A to je

**Ad 1. Prijedlog Odluke o usvajanju djelimične Izmjene Regulacionog plana „Liješnica“ Poslovno radne zone Liješnica;**

Ja ne znam koliko ste o ovome diskutovali na Kolegiju, ali evo dakle ako treba uvodničar nešto da kaže, uvodničar je tu. Treba li ? Da iznese sve. Evo gospodine Čatiću na prijedlog vijećnika SDA obrazložite nam prve četiri tačke, da ne morate ni izlaziti, ukoliko ne bude pitanja.

**Nedžad Čatić;** pozdravljam sve prisutne. Prva tačka **Prijedlog Odluke o usvajanju djelimične Izmjene Regulacionog plana „Liješnica“ Poslovno radne zone Liješnica.** Zahtjev za izmjenu Regulacionog plana podnio je Conning d.o.o. još 2019.godine. U oktobru 2019.godine donesena je Odluka o pristupanju djelimične Izmjene Regulacionog plana. U februaru 2020.godine je na Općinskom vijeću usvojen Nacrt djelimične Izmjene Regulacionog plana Liješnica i dato je na provođenje javne rasprave. Javna rasprava je bila zakazana u martu 2020.godine, međutim zbog ove situacije sa Covidom odgođena je. Poslije toga je i direktor firme bio bolestan, tako da je javna rasprava održana u julu ove godine i nije bilo primjedbi na iznesen Prijedlog Izmjene Regulacionog plana. Sama izmjena Regulacionog plana odnosi se na izmjenu u parcelaciji, tako da vlasnik zemljišta je imao dvije parcele koje su po važećem Regulacionom planu pripadale različitim građevniskim parcelama, tako da on nije mogao ostvariti gradnju. Ovom izmjenom se formiraju građevinske parcele u okviru njegovog zemljišta, njegovog vlasništva i faktički sama suština Regulacionog plana se i ne mijenja, ostaje i dalje mogućnost gradnje poslovnih objekata, samo sa izmjenjenom parcelacijom. Druga tačka je **Prijedlog Odluke o usvajanju djelimične Izmjene Regulacionog plana „Kosova“.** Ovdje se radi o prijedlogu koji je isto tako podnešen 2017.godine ili 2018.godine. Mačković Alen je podnosilac zahtjeva. Na zemljištu koje je u njegovom vlasništvu po važećem Regulacionom planu Kosova je predviđen parking. Gdje je on tražio da se tu izvrši izmjena, da se predvidi mogućnost izgradnje stambenog objekta u okviru njegovog vlasništva. Ovaj postupak je rađen po skraćenom postupku, tako da nije bilo javne rasprave. U okviru ovog postupka imamo i stav MZ-e koja je podržala ovu izmjenu. Ovom izmjenom previđena je izgradnja dva stambena objekta na zemljištu koje je u vlasništvu podnosioca zahtjeva.

**Tačka 3.Prijedlog Odluke o gubitku statusa javnog dobra u općoj upotrebi KO Kosova** u ovom predmetu koji je vođen pred imovinsko-pravnom službom, predmetna parcela je upisana kao posjed Husić Mehmeda, a u gruntovnici se vodi kao javno dobro. Znači to je po starim knjigama tu je nekada bio put ili nešto tako, tako da je izlaskom na lice mjesta utvrđeno da se dio tog zemljišta koristi kao dvorište, a dio se koristi kao prilazni put. Ovaj dio koji se koristi kao dvorište, on se i odnosi na ovaj Prijedlog Odluke o gubitku statusa javnog dobra, tako da bi ovaj Husić Mehmed mogao da riješi imovinske odnose na ovom dijelu, gdje ima izgrađene objekte, a preostali dio se nastavio koristiti kao javno dobro, znači kao put i faktički se i koristi kao put.

**Tačka 4. Prijedlog Odluke o gubitku statusa javnog dobra u općoj upotrebi KO Maglaj;** ovdje se radi o formiranju građevinske parcele po zahtjevu Mrvoljak Nisvete, to smo imali na prošloj sjednici usvajanje Izmjene Regulacionog plana u tom dijelu, gdje građevinska parcela zahvata jedan dio javnog dobra, a opet zemljište koje je u posjedu i vlasništvu Mrvoljak Nisvete zahvata, faktički je ispod postojećeg trotoara, tako da bi se u konačnici došlo do zamjene ovih nekretnina, prilikom formiranja same građevinske parcele. I naravno opet bi došlo na Vijeće kada se bude formirala građevinska parcela.

**Predsjedavajuća Svjetlana Zamboni -Radovanović;** to bi se zapravo pomirilo postojeće stanje.

**Nedžad Čatić:** da. Formirala bi se građevinska parcela i izvršila bi se zamjena.

**Predsjedavajuća Svjetlana Zamboni -Radovanović;** evo sugerira dopredsjedavajuća možda i petu tačku, kad ste već za govornicom.

**Nedžad Ćatić;** Općini Maglaj podnio je zahtjev Dedić Salim, radi se o zemljištu u Ulišnjaku, u blizini Osnovne škole. Imamo ovdje i stav Službe, ustvari to zemljište bi se koristilo za izgradnju spomen obilježja. Ukupna cijena 1960 KM. Ovo je Prijedlog Odluke da se izvrši kupovina zemljišta i da se daje ovlaštenje načelniku da se može sklopiti ovaj kupoprodajni ugovor.

**Predsjedavajuća Svjetlana Zamboni -Radovanović;** hvala vam gospodine Ćatiću. Budite tu, pa ako bude pitanja, sada idemo jednu po jednu tačku. Dakle otvaram raspravu po pitanju prve tačke dnevnog reda, a to je Prijedlog Odluke o usvajanju djelimične izmjene Regulacionog plana „Liješnica Poslovno radne zone Liješnica. Gospodin Begić, izvolite.

**Vijećnik Jasmin Begić;** selamim i pozdravljam sve, pošto izlazim prvi put za govornicu, zaželio bih sebi i vama ugodan rad i da brzo i konstruktivno završimo ovu sjednicu. Dok ste detaljno čitali ovaj materijal, ovi prijedlozi izmjena Nacrta Regulacionog plana, što je po meni okosnica razvoja jednog grada, vidjeli ste niz nelogičnosti. U industrijskoj zoni jedna firma da čeka dvije godine da dobije samo izmjenu Regulacionog plana ili odobrenje za rad dvije godine. To ja mislim nema nigdje. Ako ima, ima sigurno u opštinama koje su razvijene kao i Maglaj. Ja bih vas samo pitao hoće li i jedan strani investitor u industrijskoj zoni čekati dvije godine da dobije odobrenje za rad. Zbog čega smo pravili industrijske zone ljudi? Zbog čega? Nebitno koja je firma uopšte me ne interesuje koja je firma, nego koje smo mi gubitke proizveli ovoj firmi za dvije godine plaćanja kirije. Ovo nije problem Služba za urbanizam, nije problem ove vlasti samo. Služba za urbanizam treba realno gledati je problem od rata na ovamo. Dajte da se pobrinemo da promijenimo stvari. Ako ste gledali neku veće Federalnu televizij i gledali načelnika općine Živinice, vidjeli ste za koliko se dobiju papiri za firmu, kaže 2-3 dana maksimalno. Ljudi ovo ne govorim zbog sebe ne govorim zbog bilo koga. Svi smo mi tu zbog naroda i trebamo učiniti da mjesto življenja Maglaj bude jako dobro za omladinu, da nam omladina ne ide. S druge strane, pošto je Nedžad objedinio ove tačke.

**Predsjedavajuća Svjetlana Zamboni -Radovanović;** nismo ih mi objedinili gospodine Begiću.

**Vijećnik Jasmin Begić;** ja ću se osvrnuti i na ovu tačku. Ovo je samo komparacija, nemojte me prekidati.

**Predsjedavajuća Svjetlana Zamboni -Radovanović;** gospodine Begiću, otvorila sam raspravu po prvoj tački. Zamolila bih predsjednika Kluba SDA otvorena je rasprava po prvoj tački dnevnog reda. Hajte da budemo parlamentarni, da završimo prvu tačku.

**Vijećnik Jasmin Begić;** zaključit ću znači sljedeće ako smo napravili industrijsku zonu i ako imamo već više industrijskih zona dajte da to ubrzamo, da ubrzamo odobrenja za rad firmama. Ovo znači nema veze sa politikom, vezano je za grad Maglaj. Dvije godine u industrijskoj zoni čekati. Možete misliti koliko se čeka van industrijske zone onda.

**Predsjedavajuća Svjetlana Zamboni -Radovanović;** hoćete li iznijeti stav po pitanju materijala?

**Vijećnik Jasmin Begić;** to je moj stav.

**Predsjedavajuća Svjetlana Zamboni -Radovanović;** hvala lijepo. Ima li još diskutanata po ovoj tački dnevnog reda. Načelnik općine gospodin Mahmutagić, izvolite.

**Načelnik općine Mirsad Mahmutagić;** prije svega, sve vas srdačno pozdravljam. Nadam se da ćemo danas biti efikasni. Evo kad sam već za govornicom iskoristit ću priliku, danas ovdje nije s nama vijećnik Maid Suljaković, pa da mu u svoje ime i u ime Općine čestitam sklapanje braka. Nažalost evo prvi dio ove tačke dnevnog reda morao sam izaći telefonirati, pojavio sam se samo pred kraj govora vijećnika Begića i imao sam priliku da čujem ustaljene nebuloze iste one koje idu po facebook-u i ovdje se govore. Nije tačno da neko čeka po dvije tri godine građevinsku dozvolu, nema potrebe da čeka ukoliko su ispunjeni uslovi. Građevinsku dozvolu nije čekao ni Bingo ni Madi nije čekala ni ona famozna investitorica, niti čeka gospodin iz firme GSP itd.. Dakle trebate prvo provjeriti zašto je izmjena Regulacionog plana tekla dugo. To nije građevinska dozvola, to je izmjena Regulacionog plana. Trebate se samo zapitati da li će nakon izmjene Regulacionog plana uopšte biti investirano tu i to se raspitajte. Ali izaći ovdje i pričati ovakve gluposti, nebuloze, gledati načelnika Živinica kako je rekao da se dobiju papiri za firmu za 3 dana u Živinicama.

Papiri za firmu i izmjena Regulacionog plana i građevinska dozvola to su posve tri različite stvari. A papire za firmu, evo ovdje bi trebao da sjedi gospodin Bradarić Ferhat, ne moram vam ja govoriti, sve će vam on reći da se u Maglaju završe za jedan dan.

**Predsjedavajuća Svjetlana Zamboni-Radovanović;** hvala lijepo. Evo replika, gospodin Begić Baš sam se bila odmorila od ovoga, ali evo hajde. Neka.

**Vijećnik Jasmin Begić-replika;** svi mi znamo, barem ja znam kad sam otvarao firmu, koji papiri trebaju i koja procedura. Ja dvadeset godina radim sa firmom.nisam mislio ovo potencirati, ali ipak sam morao da vam kažem i Odluka o usvajanju Nacrta djelimične izmjene Regulacionog plana i svih ovih papira kroz koji prolaze prvo navedeni Prijedlog za izmjenu Regulacionog plana da ne imenujem firmu, znači ljudi i investitori iz grada koji su bliski vlasti, to dobivaju bez problema. Tako npr. jedan investor ima u materijalu, konkretno se govori o porodici Hrnjić. 03.02.2021.godine je počela procedura, mi to već imamo drugi put na Vijeću, a danas je 23.09.2021.godine. znači ta porodica će dobiti papire za 7-8 mjeseci koje se odnose na izgradnju stambeno poslovnog objekta, a firme koje proizvode, koje već rade, koje imaju gubitke na kirije one će čekati i dalje po 2-3 godine.

**Predsjedavajuća Svjetlana Zamboni -Radovanović;** ja vas molim da ostanete u okviru tačke dnevnog reda i da se vratimo na Prijedlog Odluke o usvajanju djelimične izmjene Regulacionog plana Liješnica Poslovno radne zone Liješnica. Iznio je svako svoj stav , kazao je li sretan ili nesretan sa onim što se događa. Privrednici znaju svoje, a ukoliko nema prijavljenih diskutanata ja ovaj Prijedlog stavljam na glasanje. Nije bilo konkretnih prijedloga u okviru same Odluke, te Odluku stavljam na glasanje Ko je za donošenje ovakve Odluke? Ima li neko protiv? Uzdržan ? Konstatujem da smo sa 24 glasa, odnosno jednoglasno usvojili ovu odluku.

## ZAKLJUČAK

1.1. 1.1. Usvaja se Odluka o usvajanju djelimične Izmjene Regulacionog plana „Liješnica“ Poslovno radne zone Liješnica; ;

### **AD 2. Prijedlog Odluke o usvajanju djelimične izmjene Regulacionog plana „ Kosova“**

**Predsjedavajuća Svjetlana Zamboni-Radovanović;**Uvodničar je obrazložio o čemu se radi. Otvaram raspravu. Nema prijavljenih diskutanata. Zaključujem raspravu. Ima li potrebe da se nešto vezano za to iznese još? Nema, te i ovaj Prijedlog stavljam na glasanje.

Ko je za donošenje ovakve odluke?

Protiv ?

Uzdržan ?

Konstatujem da smo jednoglasno usvojili i Prijedlog Odluke o usvajanju djelimične izmjene Regulacionog plana „Kosova“.

## ZAKLJUČAK

2.1. Usvaja se Odluka o usvajanju djelimične Izmjene Regulacionog plana „Kosova.

### **AD 3. Prijedlog Odluke o gubitku statusa javnog dobra u općoj upotrebi KO Kosova;**

**Predsjedavajuća Svjetlana Zamboni-Radovanović;**Otvaram raspravu.Nema prijavljenih diskutanata. Zaključujem raspravu. Ovaj prijedlog Odluke stavljam na glasanje.

Ko je za donošenje ovakve Odluke?

Protiv ?

Uzdržan ?

Nema niko.

Jednoglasno usvojeno.

## ZAKLJUČAK

3.1. Usvaja se Odluka o gubitku statusa javnog dobra u općoj upotrebi k.o. Kosova ;

### **AD 4. Prijedlog Odluke o gubitku statusa javnog dobra u općoj upotrebi KO Maglaj .**

**Predsjedavajuća Svjetlana Zamboni-Radovanović:** Otvaram raspravu. Nema diskutanata. Zaključujem raspravu, te Odluku stavljam na glasanje. Ko je za donošenje ovakve Odluke? Jednoglasno usvojeno.

## ZAKLJUČAK

4.1 Usvaja se Odluka o gubitku statusa javnog dobra u općoj upotrebi k.o. Maglaj ;

### **AD 5. Prijedlog Odluke o kupovini zemljišta**

**Predsjedavajuća Svjetlana Zamboni-Radovanović:** otvaram raspravu. Gospodin Kusr, predsjednik Kluba SDA, izvolite.

**Vijećnik Eldis Kusr:** ja vas ponovo sve selamim i pozdravljam. Samo bih htio postaviti dva konkretna pitanja kad se tiče kupovine zemljišta u MZ Ulišnjak. Pošto mi već svi znamo da u MZ Ulišnjak postoji već izgrađeno spomen obilježje u Šipragama. Ja pitam ispred Kluba SDA, šta je sa tim spomen obilježjem i da li ima potrebe da se isto sanira i da se izvrši sanacija istog. I drugo pitanje mi u Klubu SDA imamo informaciju da je već mještanim naseljenog mjesta, to jeste MZ Ulišnjak ponudio besplatno lokaciju za izgradnju novog spomen obilježja. Zašto se kupuje zemljište ako već imamo na raspolaganju ljude koji hoće da daju besplatno? To je to.

**Predsjedavajuća Svjetlana Zamboni -Radovanović;** hvala lijepo. Evo ovo za Šiprage što ste spomenuli, to je izvan ovog. Izvolite gospodine Nedžade, imate li odgovor. To je rekla kazala. Ne znamo. Dobro. Evo ima li još prijavljenih diskutanata?

Nema. Šef Službe ne zna za to, rekla kazala. Nema odgovor. Pauza na zahtjev Kluba SDA, jer ja upravo stavljam tačku na glasanje. Hoćemo pauzu za kafu da se ispričate ili da nastavimo sa radom. Nastavljamo s radom, na petoj smo tački dnevnog reda, Klub SDA tražio je pauzu, te vas molim da iznesete svoj stav nakon pauze. Izvolite.

**Vijećnik Edin Salatović ;** evo pošto i ja prvi put izlazim, koristim priliku da vas sve selamim i pozdravim. U ime Kluba vijećnika SDA predlažemo da se izvrši dodatno ispitivanje o zainteresovanosti građana za donaciju zemljišta za spomen obilježje., kako se ne bi opteretio Budžet Općine Maglaj. Naravno da to mjesto i lokacija bi trebala da bude u dogovoru sa boračkim udruženjima a to jeste sa boračima koji trenutno su gore vodili tu problematiku vezano za spomen obilježje u Ulišnjaku. Klub vijećnika SDA neće podržati ovu Odluku Vijeća.

**Predsjedavajuća Svjetlana Zamboni- Radovanović;** evo ja ću dozvolite. Javit ću se za riječ, da ne govorim s pozicije predsjedavajuće.

**Vijećnica Svjetlana Zamboni -Radovanović;** nije replika, obična je diskusija. Kada znamo koliko novca u Budžetu kako gdje ide i kako ga trošimo. Mi kakve odluke donosimo, mislim da 1960 KM ne predstavlja ništa za Budžet Općine Maglaj za ovako human i čestit čin. Toliko.

**Predsjedavajuća Svjetlana Zamboni -Radovanović;** izvolite gospodine Salatović.

**Vijećnik Edin Salatović;** evo ja ću isto, nije replika nego ću samo onaj.... Klub vijećnika je takođe gledao i lokaciju na kojoj je predviđeno. To je jedno mjesto iza škole. Mislimo da i samo mjesto to iza škole nije optimalno na tom mjestu. Znači ti ljudi koji su izrazili svoju zainteresovanost daju lokacije koje su na puno ljepšem mjestu, koje će odražavati volju tih građana i te boračke populacije.

**Predsjedavajuća Svjetlana Zamboni-Radovanović;** hvala vam lijepo. Koliko sam shvatila u uvodnom izlaganju Šefa Službe bila je javna rasprava. Nije, nego ? A ponuda. Ok.

Javlja se za riječ gospodin Mujkanović. Izvolite.

**Vijećnik Arif Mujkanović;** dobar dan, pozdravljam sve prisutne. Samo da kažem da ipak šehidske porodice su dale saglasnost za postavljanje tog spomenika i znači odgovara im ta lokacija. Mislim da ne bi trebalo dalje diskutovati po tom pitanje. Hvala.

**Predsjedavajuća Svjetlana Zamboni -Radovanović;** izvolite gospodine Kusr.

**Vijećnik Eldis Kusr ;** samo ću reći gdje piše to ? I ovo je rekla kazala, tako da ništa drugo.

**Predsjedavajuća Svjetlana Zamboni -Radovanović;** ja govorim o materijalima konkretno uvijek samo o materijalima i držim se. Mislim da je to obrazloženo. Evo šta je bio konkretan prijedlog Kluba SDA da se razmotre druge mogućnosti. Dakle da se krene u neke procedure itd. Ko je za Prijedlog SDA, da ne ponavljam ne bih znala citirati tačno, ali biti će u zapisniku tačno navedeno. Ko je za prijedlog SDA ?

**Glasalo za :** Adis Abdurahmanović, Jasmin Begić, Mirsad Bežić, Safet Jašić, Eldis Kusr, Edin Osmić, Eldin Pehrat, Edin Salatović.(SDA)

**Protiv :** Svjetlana Zamboni- Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Mustafa Bešić (SBB), Elvir Vehabović ( NBL) Pero Mamić(HDZ BH).

**Uzdržani;** Hajrudin Ferić(DF),

Sada iznosim na glasanje dakle **Prijedlog Odluke o kupovini zemljišta** u skladu sa svim onim što u ovoj Odluci stoji, dakle i od ovog ovlaštenja za Načelnika općine i sve ostalo. Ko je za donošenje ovakve Odluke?

**Glasalo za :** Svjetlana Zamboni -Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Mustafa Bešić (SBB), Elvir Vehabović ( NBL) Pero Mamić(HDZ BH), Hajrudin Ferić(DF),

**Glasalo protiv;** Adis Abdurahmanović, Jasmin Begić, Mirsad Bežić, Safet Jašić, Eldis Kusr, Edin Osmić, Eldin Pehrat, Edin Salatović.(SDA)

**Uzdržani ;** nema

## ZAKLJUČAK

5.1. Usvaja se Odluka o kupovini zemljišta

**AD 6. Nacrt Odluke o usvajanju djelimične izmjene Regulacionog plana „Centar Maglaj-sjeverni dio“**

**Predsjedavajuća Svjetlana Zamboni -Radovanović;** Uvodničar je tu. Da li ima potrebe da šef iznese uvodnu riječ. Pa ja uvijek pitam, a vi odlučujete.

**Nedžad Ćatić;** znači na dnevnom redu Nacrt Odluke djelimične izmjene Regulacionog plana „Centar Maglaj- sjeverni dio“. Na prošloj sjednici Općinskog vijeća bila je Odluka o pristupanju izmjene Regulacionog plana po zahtjevu Hrnjić Minadira i Hrnjić Melise. Radi se o izmjeni parcelacije i oblika objekta. Po dosadašnjem Regulacionom planu tu je predviđena izgradnja stambeno-poslovnih objekata lamelnog tipa. Ovom izmjenom se vrši pre parcelacija i predviđa se izgradnja pravougaonog oblika objekta sa spratnošću P do P plus 3. Isto tako se na susjednoj parceli predviđa koja je u većem dijelu općinska, izgradnja i ovog još jednog objekta koji je P plus 3, isto tako pravougaonog oblika. Ovdje se radi o Nacrtu , znači gdje nakon toga slijedi javni uvid i javna rasprava, pa opet na Vijeće ide Prijedlog Odluke o usvajanju.

**Predsjedavajuća Svjetlana Zamboni -Radovanović;** znači predlažete redovni postupak?

**Nedžad Ćatić;** redovni postupak.



**Predsjedavajuća Svjetlana Zamboni -Radovanović;** otvaram raspravu. Nema zainteresovanih za raspravu, te u skladu sa ovim što je, samo niste rekli rok provođenja javnog uvida i javne rasprave. U skladu sa materijalom, ništa drugačije. Ovaj Nacrt dakle stavljam na glasanje. Ko je za usvajanje Nacrta?

**Glasalo za ;** Svjetlana Zamboni-Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić (SDP), Aida Bašić (A-SDA), Mustafa Bešić (SBB), Elvir Vehabović (NBL) Pero Mamić(HDZ BH), Hajrudin Ferić(DF),

**Glasalo protiv ; ;** Adis Abdurahmanović, Jasmin Begić, Mirsad Bejzić, Safet Jašić, Eldis Kusur, Edin Osmić, Eldin Pehrat, Edin Salatović.(SDA)

**Uzdržani ;** nema.

Konstatujem da smo usvojili Nacrt Odluke o usvajanju djelimične Izmjene Regulacionog plana „Centar Maglaj- sjeverni dio“ u skladu sa Prijedlogom u samoj odluci.

## ZAKLJUČAK

6.1. Usvaja se Nacrt Odluke o usvajanju Nacrta djelimične izmjene Regulacionog plana „Centar Maglaj – sjeverni dio;

**AD 7.Nacrt Odluke o usvajanju Nacrta djelimične Izmjene Regulacionog plana „Novi Šeher“,**

**Predsjedavajuća Svjetlana Zamboni -Radovanović;** Nedžade molim vas, uvodnu riječ.

**Nedžad Ćatić;** znači i u ovom slučaju se radi o Nacrtu dokumenta, nakon čega slijedi javna rasprava i javni uvid. Izmjena Regulacionog plana se odnosi na izmjenu parcelacije i djelimične izmjene u saobraćajnom rješenju. To je ovaj dio prije crkve u Novom Šeheru, gdje se vrši parcelacija drugačija, po zahtjevu stranke gdje on ima drugačije zahtjeve radi izgradnje i prodaje placeva i radi rješavanja prilaza prema postojećim prilaznim putevima kakvi su na terenu.

**Predsjedavajuća Svjetlana Zamboni- Radovanović;** hvala lijepo. Otvaram raspravu. Zatvaram raspravu po ovoj tački dnevnog reda, te vas molim da se izjasnite o Nacrtu Odluke o usvajanju Nacrta djelimične Izmjene Regulacionog plana „Novi Šeher“.

Ko je za ?

Protiv ?

Uzdržan ?

Usvojeno jednoglasno.

## ZAKLJUČAK

7.1. Usvaja se Nacrt Odluke o usvajanju Nacrta djelimične izmjene Regulacionog plana „Novi Šeher

**Ad 8.Prijedlog Odluke o izmjenama i dopunama Poslovnika o radu Općinskog vijeća Maglaj.**

**Predsjedavajuća Svjetlana Zamboni -Radovanović;** evo iako neko vrijeme nisam učestvovala u radu pretpostavljam da će predsjednik Komisije jel tako, gospodin Ferić izaći ili obrazložiti o čemu se radi. Izvolite.

Za riječ se javlja i gospodin Bradarić nakon toga.

**Vijećnik Hajrudin Ferić;** srdačno pozdravljam rukovodstvo predsjedavajuću i dopredsjedavajuću i drago mi je da vas vidim nakon ove pauze. Naravno sve vas vijećnike također i evo želim vam nastavak rada ove sjednice uspješnim. Naime, niste dobili obrazloženje uz prijedloge iako je obrazloženje bilo kao dio ove Odluke o izmjenama Poslovnika u radnoj verziji i kroz Komisiju, a naravno i u Službi, pa evo na neki način sam dužan da vam dam par rečenica

obrazloženja uz ovaj Prijedlog koji ste i dobili u materijalima. Naime, ako se sjećate kroz zaključke, kroz određene inicijative Općinskog vijeća kada se raspravljalo o prijedlozima izmjena Poslovnika o radu Općinskog vijeća, moglo se implicitno razumjeti da Komisija za propise, Statut i Poslovnik o radu, ima obavezu da sačini jedan kvalitetan prijedlog izmjena Poslovnika, a koji se odnosi na rad Općinskog vijeća u vanrednim okolnostima. Dakle Komisija je zasjedala, i to zaista uradila temeljito i nakon što je utvrdila ovaj prijedlog izmjena, zatražili smo i mišljenje načelnika, a prije nego ovaj materijal dođe na sjednicu i kao što smo evo svi upoznati, mi smo mišljenje načelnika i dobili. Ako se ne varam svi su vijećnici dobili.

**Predsjedavajuća Svjetlana Zamboni -Radovanović;** nismo dobili, ako možete samo da ponovite.

**Vijećnik Hajrudin Ferić;** dobro evo upoznat ću vas i s tim. Dakle evo nekoliko rečenica obrazloženja, Komisija je znači prilikom izrade ovih izmjena, imala u vidu sljedeće činjenice.

Veoma je mali broj općinskih i gradskih vijeća u BiH, posebno u Federaciji do trenutka održavanja ove sjednice, izvršio prilagođavanje svojih Poslovnika o radu u uslovima pandemije. Oni koji to jesu, uradili su npr. Općinsko vijeće Centar Sarajevo Stari Grad, Ilidža, Travnik itd. Komisija je stekla takođe uvid u prilagođavanje Poslovnika o radu gradova i općina u Republici Hrvatskoj, očigledno da su to tamo bile Instrukcije i da su sve općine na neki način morale da prilagode svoje Poslovnike i učinili su na prilično kvalitetan način i mi smo naravno konsultovali njihove Poslovnike. Pomenut ću samo nekoliko gradova, Slavonski Brod, Varaždin, Omiš itd. koji su zapravo svi na sličan način regulisali pitanje održavanja online sjednica. Predviđen je dakle rad video sjednica ili online sjednice putem službene jedinstvene aplikacije predviđene za ovu vrstu djelatnosti. Pomoć u vođenju sjednica, znači identifikacija, utvrđivanje kvoruma, glasanje oduzimanje i davanje riječi itd. uglavnom osim predsjedavajućeg obavezno je pojačan taj tim. Kod nas se to radi otprilike i u normalnim okolnostima, znači daju dopredsjedavajući i predstavnik Službe. Zatim način identifikacije takođe je precizno utvrđen i glasanje na video sjednicama je regulisano manje-više slično u ovim prethodnim Poslovnima, prethodna potvrda, identifikacija o prisustvu, validno učešće itd. Sistem održavanja video sjednica Općinskog vijeća je veoma primjenljiv u nizu vanrednih okolnosti, ne samo u stanju pandemije korona virusom kao što su npr. određene prirodne nesreće kada je onemogućeno fizičko kretanje vijećnika ili većeg dijela vijećnika npr. zbog klizišta, poplave, požara, određenih protesta, buntova itd., a sve smo mi to ranije imali i na neki način pretpostavljamo da recimo veliki broj vijećnika koji dolaze sa šeherskog kraja ili sa sjevernog dijela naše općine u slučajevima saobraćajne nesreće ako je teža gdje je put blokiran, takođe mogu da koriste kombinovano i ovaj način učešća u sjednicama Općinskog vijeća.

**Predsjedavajuća Svjetlana Zamboni -Radovanović;** ako dozvolite predsjedniče Komisije, sve pod uslovima da imamo struje i interneta.

**Vijećnik Hajrudin Ferić;** to ću na kraju reći. Dakle Komisija je takođe imala na umu, sastav Općinskog vijeća je takav da su različita saznanja i vještine vijećnika u pogledu rukovanja aplikacijama za video nadzor, a da je nemoguće na različitim aplikacijama istovremeno održavati sjednicu pa smo smatrali da je neophodno izvršiti izradu uputstva ili obaviti edukaciju vijećnika o tehničkom rukovanju aplikacijom za održavanje sjednica Općinskog vijeća. Komisija je takođe smatrala da je najpovoljniji način za dostavu materijala vijećnicima elektronskim putem kao i praktikovanje održavanja video sjednica na taj način što bi vijećnik dobio službenu e-mail adresu, odnosno službenu domenu, a sve to bi imalo neke benefite u smislu ekološkog, ekonomskog razloga. Znači, sigurno da će se nametnuti puno pitanja obzirom da život donosi različite neplanirane aktivnosti kao što je bolest, kvar itd., ali sve te okolnosti ili viša sila se rješava našom sposobnošću na ad hoc način kako se zateknemo itd. Uglavnom, dalje nastavlja se rješavati kako se rješava i život teče dalje. S druge strane, pojedini vijećnici ukoliko imaju određene poteškoće također mogu tražiti pomoć i od svojih stranačkih kolega i predstavnika Službe i kolega vijećnika, članova porodice, zajedno biti eventualno više njih u istoj prostoriji itd. To su svi ovi problemi koji su eventualno mogući. Kako kaže predsjedavajuća nestane interneta, to vam je isto kao i da nestane struje ili auto se pokvari kada krenete na sjednicu što uvijek ima i onih koji se bave

poslovima, biznisom, znaju šta su to elementi, uslovi više sile. Prema tome, ovo je i moj lični stav i stav Komisije izuzetno korektan, dobar kvalitetan i prilično precizan prijedlog izmjena u kojima se zaista, što nam je bilo posebno na umu ne oduzima, ali aposlutno ne uzima ni jedno pravo, niti jednog vijećnika da aktivno učestvuje, raspravlja, donosi odluke na kvalitetan način i kako bi to bilo u ovim normalnim uslovima.

**Predsjedavajuća Svjetlana Zamboni -Radovanović;** pojam cjeloživotno učenje, na kraju krajeva pojam 21.stoljeća, tako da izvolite, gospodin Bradarić.

**Vijećnik Mirza Bradarić;** obzirom, pošto izlazim prvi put danas, želim na početku zaista da vas sve srdačno pozdravim. Odmah ću na početku reći da će Klub SDP-a prihvatiti ovaj Prijedlog kako smo dobili i u materijalima. Kolega Fermić, je već dosta stvari rekao, tako da ja od onog što sam planirao moram dobar dio i izbaciti da se ne ponavljamo, međutim ova tačka se zaista morala pojaviti na Vijeću iz jednog prostog razloga. Poslovnik o radu Općinskog vijeća koji svi mi imamo je izdat u februaru 2013.godine. tada još zaista nije bilo možda neke potrebe za izmjenama i dopunama ovog Poslovnika kao što svi znamo kad se malo vratimo unazad 10-tak godina nije bilo zaista ovih problema s kojima se danas susrećemo i tehničkih mogućnosti. Međutim svjedoci smo mi svi da Poslovnik je izdat u februaru 2013.godine, a već 2014 godine imali smo one probleme sa poplavom. Nakon toga evo od prije skoro dvije godine pojavio nam se i ovaj problem sa Covidom itd itd. Tako da zaista svih onih stvari koje su trebale ukomponovati u ovaj Poslovnik i tehničke stvari i sve one ostale, nisu bile ukomponovane ovdje u ovaj Poslovnik koji je izdat eto prije nekih već 8 godina, tako da zaista ovo je već moralo pretrpjeti određene izmjene i dopune. Gledajući ovaj materijal zaista je, ja koliko sam uspio primjetiti, a i mi kad smo imali Klub, da sve one stvari koje smo mi na predhodnim sjednicama razgovarali su u velikoj mjeri ovdje i stavljene kao prijedlog. Tako da iz svih tih razloga ja vjerujem da možda postoji kolega koji će možda još nešto dodati i zaista sve ono što je konstruktivno mi smo saglasni i to ćemo i prihvatiti ako nešto dođe još na dopunu ovog prijedloga. Toliko, sad za sad.

**Predsjedavajuća Svjetlana Zamboni -Radovanović;** hvala vam lijepo. Gospodin Abdurahmanović.

**Vijećnik Adis Abdurahmanović;** ja selamim i pozdravljam sve prisutne. Što se tiče Prijedloga Odluke Klub vijećnika SDA ima nekoliko sugestija. U članu 2.ove Odluke stoji da se mijenja član 59. Poslovnika o radu i da se istom dodaje stav 5. koji se tiče zakazivanja vanredne sjednice. A pošto ovdje nije definisano postavljamo pitanje šta je sa već postojećim stavom 5. da li se isti briše ili se ovi ostali pomjeraju. Dalje, Klub vijećnika SDA predlaže da se u članu 3.ove Odluke ostavi mogućnost da se vijećnicima dostava i printani materijal za sjednice Općinskog vijeća, kao i da se prošire mogućnosti kako bi se dostava materijala prilagodila i vijećnicima sa određenim invaliditetom, slijepim licima i sl. Kao što znate na predhodnim izborima imali smo na listama lica koja su bili invalidi. Postavljamo pitanje na koji način Služba OV i ON misli raspolagati službenim mailovima vijećnika, a kako bi se izbjegle eventualne zloupotrebe?

**Predsjedavajuća Svjetlana Zamboni -Radovanović;** ne razumijem to pitanje, hoćete li obrazložiti?

**Vijećnik Adis Abdurahmanović;** tamo u materijalu stoji da će Služba OV i ON napraviti mailove, pasworde svakom vijećniku ponaosob.

**Predsjedavajuća Svjetlana Zamboni -Radovanović;** neće pasworde. Password će sebi odrediti sam vijećnik.

**Vijećnik Adis Aburahmanović;** dobro evo ja sam postavio pitanje. Ima više pitanja, možete obrazložiti nakon mog izlaganja.

**Predsjedavajuća Svjetlana Zamboni -Radovanović;** dozvolite samo da ja sugerišem. Znači sve ovo što se radi, radi se samo u smislu funcionisanja Vijeća. To nije privatni mail. To je službeni mail vijećnika Općinskog vijeća u sazivu u kojem postoji, a privatne vi sebi...

**Vijećnik Adis Abdurahmanović;** dalje, članom 6. ove Odluke predviđa se da se u članu 101 Poslovnika o radu Općinskog vijeća Maglaj stoji između ostalog instaliranje određenih aplikacija koje vijećnici možda ne žele da instaliraju na svoj privatni uređaj.

**Predsjedavajuća Svjetlana Zamboni- Radovanović;** govorimo opet o aplikaciji koja podržava obavljanje posla vijećnika.

**Vijećnik Adis Abdurahmanović;** možete li me pustiti da završim pa da poslije odgovorite ili replicirate.

**Predsjedavajuća Svjetlana Zamboni -Radovanović;** mogu naravno.

**Vijećnik Adis Abdurahmanović;** hvala lijepo. Znači ponavljam članom 6.ove Odluke predviđa se da se u članu 101. Poslovnika o radu Općinskog vijeća Maglaj, između ostalog i instaliranje aplikacija koje vijećnici možda ne žele instalirati na svoj privatni uređaj iz sigurnosnih i drugih razloga. Predlažemo da ukoliko već zaživi ovaj predloženi član 101. da se vijećnicima obezbijede i službeni uređaji koji će podržavati pomenute aplikacije, a koje će vijećnici zadužiti u trajanju mandata. Znači, obrazlažem, Klub vijećnika SDA smatra da ovaj Prijedlog Odluke o izmjenama i dopunama Poslovnika o radu Općinskog vijeća Maglaj trenutno ne može zaživjeti u praksi i da će se njome u suštini jedino ukinuti dostavljanje materijala vijećnicima u printanoj formi, a svima u cilju nam treba biti da proširujemo, a ne da sužavamo mogućnosti i stoga Klub vijećnika SDA neće podržati ovaj Prijedlog Odluke o izmjenama i dopunama Poslovnika o radu Općinskog vijeća. Da se nadovežem, raduje me činjenica koju je pomenuo kolega gospodin Ferić, da je Služba OV i ON, a i sam načelnik potvrdio da može ispuniti tehničke uslove na koje sam se ja ovdje dotakao. I malo ću se našaliti na kraju na jednu opasku gospođe predsjedavajuće rekli ste da moramo imati struju, internet i to sve, uzimajući u obzir koliko imamo vijećnika sa kraja Novog Šehera, a kako imaju kvalitetnu odrađenu struju i internet bojim se da nećemo imati kvoruma.

**Predsjedavajuća Svjetlana Zamboni -Radovanović;** kantonu ćemo se obratiti za te stvari, a ne Općini. Ako mogu samo ja zaista jedno vrijeme nisam učestvovala u radu Kolegija, ali sam bila u kontaktu sa .... Naravno vi ćete dobiti riječ da odgovorite. Mišljenje ? Hajte onda, pa ću ja reći.

**Vijećnik Hajrudin Ferić;** samo malo, ja se izvinjavam našao sam pogrešan mail.

**Predsjedavajuća Svjetlana Zamboni - Radovanović;** evo dok predsjednik Komisije traži ovaj mail, vi znate da evo i u Natron-Hayatu i u svim većim poslovnim subjektima zapravo funkcioniraju upravo na ovaj način. Gdje imaju službeni mailovi i ne koriste se...

**Vijećnik Hajrudin Ferić;** evo ja ću pročitati, možda će biti dosta jasnije. Dakle na osnovu dopisa koji je Komisija za statutarna pitanja, Poslovnik i propise uputila Načelniku općine Maglaj na izjašnjenje odgovor je sljedeći: Općina Maglaj može obezbjediti službene mail adrese za svakog vijećnika, potrebno je samo urediti podešavanja na uređaju koje vijećnici koriste. E-mail adrese bi bile [ime.prezime@maglaj.ba](mailto:ime.prezime@maglaj.ba). Održavanje sjednica Općinskog vijeća putem video konferencije, Općina Maglaj je u mogućnosti organizovati sjednicu Općinskog vijeća i u Službi ON i OV postoje uslovi za organizovanje takve sjednice. U tom slučaju svaki vijećnik bi bio samo obavezan osigurati uređaj sa ispravnom kamerom i mikrofonom. Za održavanje sjednica putem video konferencije Općina Maglaj bi obezbjedila neophodne licence.

**Predsjedavajuća Svjetlana Zamboni -Radovanović;** hvala lijepo.

Mislim da je sad sve jasno. Hoćete izaći za govornicu radi zapisnika.

**Vijećnik Mirza Bradarić;** ništa evo i ja ću samo ponoviti ovo što je kolega Adis pitao. U članu 59..

**Predsjedavajuća Svjetlana Zamboni - Radovanović;** gospodine Feriću, hoćete vi samo obratit pažnju na ovo pošto ste i predlagač.

**Vijećnik Mirza Bradarić;** obzirom da ne bi bilo nekakvih nesuglasica ovo što je kolega Adis spomenuo član 59. jel stav 5. ostaje pa dodajemo stav 6. ili se ovaj stav 5. Briše, a dodaje novi stav 5. Znači ostaje stav 5.a ovdje u Prijedlogu ovog materijala mjesto stava 5. Treba biti stav 6. Hvala.

**Predsjedavajuća Svjetlana Zamboni - Radovanović;** ima li još pitanja? Stav 5.postaje stav 6. Da li ima još pitanja? Jos evo gospodin Begić ima neko pitanje.

**Vijećnik Jasmin Begić;** ja bih samo jednu opasku predsjedniku Komisije ova rasprava, ovo što ide uzima nam vrijeme bezveze. To je samo nedostatak materijala , propratnog materijala uz ovu tačku dnevnog reda. Molio bih da svaka naredna sjednica bude popraćena materijalom i informacijama o kojima se mi raspravljamo, a stvarno nema potrebe.

**Predsjedavajuća Svjetlana Zamboni -Radovanović;** hvala lijepo.

Dakle razjasnili smo šta je sa članom 59., da stav 5. sada postaje stav 6. ako ubacimo ovo iz Prijedloga. Po mišljenju načelnika općine mislim da smo dobili i odgovore na sve ove sumnje da li je moguće i imali smo ovaj Prijedlog koji je iznio gospodin Abdurahmanović vezano za uređaje. Dakle prijedlog gospodina Abdurahmanovića bila je nabavka uređaja koji će za svakog vijećnika da se obezbijedi uređaj koji će moći podržati ovaj Prijedlog i da se dostavljaju printani materijali.

**Ko je za takav prijedlog?** Adis Abdurahmanović, Jasmin Begić, Mirsad Bežić, Safet Jašić, Eldis Kusur, Edin Osmić, Eldin Pehrat, Edin Salatović.(SDA)

**Protiv?** Svjetlana Zamboni- Radovanović, Elvir Arnautović, Fikret Delić, Jasmin Đuhera, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Elvir Vehabović ( NBL) Hajrudin Fermić(DF),

**Uzdržani ;** Samir Fetić, Firuz Galiješević, Mirza Bradarić(SDP),Mustafa Bešić(SBB), Pero Mamić(HDZ BH).

Većinski su bili protiv, te Prijedlozi nisu dobili potrebnu većinu.

Sljedeće o čemu se izjašnjavamo jeste sam Prijedlog Komisije o izmjenama i dopunama Poslovnika o radu Općinskog vijeća Maglaj. Ko je za usvajanje ovih izmjena:

**Glasalo za :** Svjetlana Zamboni -Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Mustafa Bešić (SBB), Elvir Vehabović ( NBL) Pero Mamić(HDZ BH), Hajrudin Fermić(DF),

**Glasalo protiv;** Adis Abdurahmanović, Jasmin Begić, Mirsad Bežić, Safet Jašić, Eldis Kusur, Edin Osmić, Eldin Pehrat, Edin Salatović.(SDA)

**Uzdržani ;**nema.

## ZAKLJUČAK

8.1. Usvaja se Odluka o izmjenama i dopunama Poslovnika o radu Općinskog vijeća Maglaj;

### **AD 9. Odluka o davanju saglasnosti za konačno imenovanje direktora JU Dom kulture „Edhem Mulabdić“**

**Predsjedavajuća Svjetlana Zamboni -Radovanović;** Emina zamolila bih Vas da samo gospodina Bilića pozovete. Ah tu ste, oprostite.Ima li potrebe iako materijal ja mislim da sve govori. Ima li potrebe za uvodničarem, članom Upravnog odbora gospodin Jasmin Bilić da da uvodnu riječ.Ima potrebe, evo gospodin Bilić, izvolite.Ja vas molim, s obzirom da sam još uvijek bila na čelu ustanove, da objasnite kako je provedena procedura i sve ostalo.

**Jasmin Bilić;** gospođu predsjedavajuća, dopredsjedavajuća, gospodine načelnice, gospodo vijećnici, na drugoj sjednici Upravnog odbora JU Dom kulture „Edhem Mulabdić“ Maglaj, shodno Zakonu o ministarskim i vladinim i drugim imenovanjima, a na osnovu zahtjeva o razrješenju dotadašnje direktorice ustanove gospođe Svjetlane Zamboni Upravni odbor slijedeći pravila uputio je dopis osnivaču za imenovanje komisije, to jeste jednog člana Komisije, a druga dva člana su bila ispred JU Dom kulture „Edhem Mulabdić“ Maglaj. 22.jula 2021.godine konkurs za direktora objavljen je u Oslobođenju, Službenim novinama FBiH, i po osnovu raspisanog konkursa pristigle su dvije prijave. Shodno tim prijavama komisija Upravnog odbora Doma kulture sastala se 09.augusta. U sastavu te Komisije su bili predsjednik Upravnog odbora gospodin Josip Jurišić, član Upravnog odbora Damir Bašić ispred reda osnivača i gospođica Arnela Tumbić ispred Općine Maglaj. Komisija je ustanovila da su obje prijave ispunjavale uslove i zakazala je 13-tog augusta intervju. U 09:00h je obavljen razgovor sa Dragomirom Dunderom, a gospodin, ja sam prije početka intervjuja odustao od kandidature. Prvo prijavljeni gospodin Dragomir Dunder ispunjavajući sve uslove tražene u konkursu i po bodovima koje je ostvario na kraju je predložen Općinskom vijeću da se da saglasnost na njegovo imenovanje. To bi bilo ukratko. Evo mi samo čekamo da nam date saglasnost da možemo imenovati direktora. Ako još nešto treba tu sam, izvolite.

**Predsjedavajuća Svjetlana Zamboni -Radovanović;** ako dozvolite Jasmine, samo prijavljena su dva kandidata. Jedan je odustao i preostao je samo jedan. Hvala lijepo. Otvaram raspravu. Izvolite gospodine Osmić .

**Vijećnik Edin Osmić;** ja bih isto sve da pozdravim. Klub vijećnika SDA, znači stav Kluba vijećnika SDA neće podržati Odluku o davanju saglasnosti za imenovanje direktora JU Doma kulture „Edhem Mulabdić“ Maglaj. Prije sve iz principijelnih razloga kao i kod ostalih imenovanja. Pored toga smatramo da Dom kulture koji je ionako u teškom stanju zaslužuje kompetentnog direktora, a ne agronoma koji nema nikakvog iskustva u radu u kulturnim ustanovama, a takođe je evidentno da je aktuelnoj SDP vlasti jedino bitno zadržavati vlast pa se tako može koalirati i sa nacionalnim strankama, što nema nikakve veze sa poimanjem socijaldemokratije koji zastupaju. I ovo nema ništa lično protiv gospodina.

**Predsjedavajuća Svjetlana Zamboni -Radovanović;** hvala lijepo, javljam se za riječ.

**Vijećnica Svjetlana Zamboni -Radovanović;** javljam se za riječ, zato što u momentu provođenja konkursne procedure bila sam na čelu JU Doma kulture „Edhem Mulabdić“ Maglaj. I žao mi je što danas pred sobom nemam materijal, odnosno biografiju gospodina Dunđera, koja je zaista zavidna. O njegovim vještinama i sposobnostima ne govori samo ono što je napisano u njegovom CV-u i onome što je postigao u životu, ali vjerujem da na čelu ustanove, na čijem sam i ja bila, dolazi jedna odgovorna i vrlo sposobna osoba, te da će rezultati njegovog rada govoriti o tome. Ukoliko ste htjeli, a sudite o tome da li je gospodin sposoban ili nije. Dakle ako može voditi jednu ustanovu kantonalnog tipa, ne vidim zašto ne bi bio dovoljno vješt i sposoban da vodi ustanovu na općinskom nivou. A biografija koja je dostavljena sa svim preporukama koje su dostavljene na njegovo ime, zaista je zavidna. I ja se ponosim da je takav kandidat odlučio da se prijavi za direktora jedne ustanove, koja zaista ima vrlo ozbiljne probleme o kojima ćemo nadam se imati prilike govoriti i na nekim narednim sjednicama Općinskog vijeća. Hvala.

Što se tiče SDP-a, Klub vijećnika SDP-a da li će iznijeti stav, to vezivanje partijsko i to, ja ne bih komentarisala, zaista suvišno je. To je politika partija. To ne raspravljamo mi na Vijeću, niti je to naša nadležnost, niti mi iznosimo takve stavove. Ja sam zato naglasila, da dopuni gospodin Bilić. Konkurs je objavljen i u Službenim novinama FBiH, na svim oglasnim pločama na području općine Maglaj, oglasnoj ploči Doma kulture, na zvaničnoj stranici Facebook stranici, dakle i stranici Općine Maglaj. Na konkurs se prijavila samo dva kandidata.

**Dopredsjedavajuća Aida Bašić;** hvala predsjedavajuća. Izvolite gospodine Biliću.

**Jasmin Bilić;** evo da ne ispadne da se ponavljam. Jeste, samo su se prijavila dva kandidata. Konkurs je bio javan. Ja sam se prijavio ispred ustanove da ne bude da nije niko htio ispred ustanove, jer u ovoj ustanovi ima još kvalitetnih ljudi. Znači, nisam samo ja čovjek koji ima visoku stručnu spremu. Imamo još ljudi koji imaju visoku stručnu spremu. Bilo je kao što kaže gospođa Zamboni- Radovanović na našoj oglasnoj ploči, na web stranici Općine Maglaj. Sve je bilo javno, transparentno, znači mogao se prijaviti ko god je htio. To je to.

**Predsjedavajuća Svjetlana Zamboni- Radovanović;** hvala vam lijepo, gospodine Biliću. Prijavio se gospodin Jašić, a onda i gospodin Pero.

**Vijećnik Safet Jašić;** sve vas lijepo selamim i pozdravljam i uključit ću se nakratko u ovu Odluku o imenovanju za direktora Doma kulture.

**Predsjedavajuća Svjetlana Zamboni -Radovanović;** malo glasnije samo radi snimka, molim vas.

**Vijećnik Safet Jašić;** može, može. Jedan od problema koji mi stalno ovdje slušamo jeste upravo ovo gospođu što se vi objašnjavali. Vi imate neke biografije tamo koje su zaista posebne, prestižne itd. ali nema ovdje. De te nas ubijedite u materijalima da mi možemo kazati jeste gospodin je taj i taj odgovarajuća osoba koja treba da vodi kulturu u Općini Maglaj. Šta ste vi nama dostavili? Sada pričate nešto tamo može voditi ovo, može voditi ono. Govori se ovdje o JU Doma kulture , prema tome ja ne znam kakav je Pravilnik. Evo tražit ću od gospodina Bilića, da nam objasni, jel zaista postoji u Pravilniku mogućnost imenovanja direktora ovakve Javne ustanove, čovjeka koji je, koji dolazi iz poljoprivrede, koji uopšte nije za podcijeniti što dolazi iz poljoprivrede, ali u svome

nekome tamo fahu. Prema tome, meni to evo kao laiku, treba mi objašnjenje kako može biti agronom direktor Javne ustanove, pored toliko zanimanja društvenog smjera.

**Predsjedavajuća Svjetlana Zamboni -Radovanović;** ama dva se kandidata prijavila na Javni konkurs.

**Vijećnik Safet Jašić;** što se tiče biografije, nemojte prekidati kada vijećnici govore, ugrožavate nam pravo.

**Predsjedavajuća Svjetlana Zamboni -Radovanović;** jelde? Nisam znala, oprostite. Evo sad znam i to.

**Vijećnik Safet Jašić;** znači, što se tiče biografije, ja vas molim, trebali ste nas iznenaditi, obasut nas ovdje tom silnom biografijom pa da mi to vidimo, da kažemo jest i mi podržavamo ovakvog kandidata on će unaprijediti kulturu.

**Predsjedavajuća Svjetlana Zamboni -Radovanović;** odlično. Evo predsjedavajuća ima riječ, molim vas. Kada ja kažem šta imam. Replika, ali predsjedavajuća prije toga govori. Dakle na traženje bilo koga od vas, ja vam sada govorim kao predsjedavajuća Općinskog vijeća. Na traženje vijećnika za dostavu bilo kakvog materijala koji se odnosi na tačku dnevnog reda, Općinsko vijeće ima obavezu da vam dostavi. Do današnjeg dana niti jedan od vas nije tražio da vam se dostavi niti biografija, niti bilo šta od materijala koji su bili obavezna dokumentacija u provođenju ove procedure. Prema tome, danas ste došli i danas mi pričate o tome da vam je nepoznato ili poznato o kome se radi, a niste se obratili Vijeću, odnosno Komisiji za izbor i imenovanja, odnosno Upravnom odboru ustanove da vam nešto dostavi. Mogli ste to od kada, kada je bio konkurs, koliko je prošlo, ne znam više ni ja, dva mjeseca. Gospodin Vehabović, izvolite replika. Prvo je gospodin Vehabović.

**Vijećnik Elvir Vehabović-replika;** replika gospodinu Jašiću, znači upravo ovo što je predsjedavajuća rekla. Ispoštovana je zakonska procedura. Znači Upravni odbor je taj koji pregleda i gleda odnosno u ovom slučaju Komisija koja će pogledati biografije i odlučiti da li taj kandidat zadovoljava ili ne. Mi možemo ovdje sada tražiti da dođe taj gospodin, da kleči pred nama, ovo ili ono, ali to nije zakonska osnova. Zakonska osnova je ta, da Općinsko vijeće da ili neda saglasnost na predloženo ime. Ako ste tražili šta dodatno, trebali ste se obratit pismenim putem pa da se dostavi vama i biografija i sve a ne danas to govoriti.

**Predsjedavajuća Svjetlana Zamboni -Radovanović;** slažem se. Gospodin Mamić izvolite. Ali javio se gospodin Mamić, na ranije iznesene stavove. Morate čekati da vijećnici završe.

**Vijećnik Pero Mamić-replika;** hvala lijepo. Ja vas pozdravljam. Znači sami da ja vrlo rijetko izlazim, sada sam morao s obzirom da se radi o članu normalno i HDZ-a i Dragomiru Dunderu i žao mi je što evo ja ću konkretno reći gospodinu Jašiću. On bolje zna Dragomira Dundera nego ja, vjerujete. I dobar dio vijećnika iz SDA vjerujte mi znaju bolje Dragomira Dundera nego ja i to je nekorektno. Ja kažem po kompetencijama da ne bih stvarno raspravljao, nije to ni moj stil ni način ni ništa. Ljudima treba dati šansu. Čovjek nije radio ni jedne minute, vi nemate pojma kako on radi, a znate vrlo dobro kako on radi jer ste s njim surađivali. Velika većina ljudi koji ovdje sjede je surađivala s njim. I vjerujte mi, ja deset godina nisam...on je radio u Općini Maglaj i vi ste dolazili kod Dragomira Dundera duplo više nego ja, a ja čovjeka nisam znao, prije 10 godina ga upoznao kada sam ušao u sve ovo skupa. Prema tome, mislim da bi trebali biti korektni, iskreni i da bi trebali dati čovjeku šansu i mislim da čak poslije razgovarati i pričati o njegovim rezultatima. Da ne govorim o ovome da se ponavljam, što je imao svako mogućnost prijaviti se. Ako je zakonska procedura provedena i ako je šta onda bi trebalo dati uistinu čovjeku šansu, da pokaže koliko on uistinu zna, a ovo je krajnje nekorektno govoriti da čovjek ne zna. I da ne poznaje niko njega, a znate ga bolje nego ja.

**Predsjedavajuća Svjetlana Zamboni -Radovanović;** hvala lijepo gospodine Mamiću. Prva je bila replika od gospodina Galijaševića pa onda Vi.

**Vijećnik Firuz Galijašević-replika;** ma samo ću reći . Bila su prijavljena dva kandidata. Jedan je odustao. Ovaj je ispunio uvjete ili uslove da bude direktor. Bezveze raspravljamo o njegovim kvalitetima.

**Predsjedavajuća Svjetlana Zamboni -Radovanović;** već smo to kazali, hvala vam gospodine Galijaševiću. Gospodine Jašić.

**Vijećnik Safet Jašić-replika;** itekako vi to pogrešno implementirate ono što sam ja rekao. Prvo doktore, ja od tebe nisam tražio objašnjenje nego od Jasmina Bilića, pravnika JU Doma kulture.

**Predsjedavajuća Svjetlana Zamboni -Radovanović;** obraćate se, gospodine Jašiću, obraćate se vijećniku Općinskog vijeća doktoru Vehaboviću.

**Vijećnik Safet Jašić-replika;** dalje, gospodine Mamiću niko nema protiv Dunđera ništa. On je izuzetno dobar radnik i ono što je radio tamo čestito čovjek radio, u tome smo pravcu, odnosno ja sam u tom pravcu koje su meni replike upućene i mislim o Dunđeru sve najbolje, ali u njegovom dijelu, u njegovom, odnosno kad je njegovo zanimanje i profesija u pitanju. Govorimo sada o jednoj drugoj stvari, što mi nimalo ne liči jedna na drugu, o tome smo govorili. Niko nema protiv Dunđera bilo šta lično, ni protiv bilo kakvog njegovog napretka u karijeri njegovoj poslovnoj, ali govorimo o njegovoj školskoj spremi, odnosno kvalifikaciji, smjeru itd. i direktoru Javne ustanove. Imamo pravo malo da govorimo na ovu temu. Brate mili, obrazložite. Evo ja i dalje tražim od ovoga gospodina Bilića, da mi objasni malo u Pravilniku šta stoji tamo i ako stoji, Pravilnik se mijenja, može se promijeniti za dva sata, ali imamo pravo na svoje mišljenje da se bavi svako onim gdje pripada.

**Predsjedavajuća Svjetlana Zamboni -Radovanović;** javljam se za riječ.

**Vijećnica Svjetlana Zamboni -Radovanović;** što se tiče propisa, ja bih voljela da svi mi vijećnici dakle znamo po čemu i na osnovu čega funkcioniše rad Javnih ustanova čiji smo mi osnivači. Naša je obaveza da znamo šta Zakon, odnosno koje Uredbe uređuju rad Ustanova za koje mi donosimo Odluke, o čijim izvještajima mi raspravljamo i kojima mi treba da kažemo šta, kako i gdje. Mislim da bi svaki vijećnik trebao to da zna, a ne da na sjednici kada govorimo o konačnom imenovanju tražimo da nam neko podastre neki Pravilnik. Pa valjda znamo kako funkcionišu, valjda mi vijećnici moramo znati kako funkcionišu naše javne ustanove i naša javna preduzeća i sramota je da mi to ne znamo i da tražimo danas na sjednici kada govorimo o konačnom imenovanju. Nakon provedenih svih procedura koje su propisane Zakonom, da nam danas neko objašnjava na osnovu čega naša Javna preduzeća i naše Javne ustanove rade. Toliko.

**Dopredsjedavajuća Aida Bašić;** hvala predsjedavajuća. Izvolite, gospodin Smailović.

**Vijećnik Almin Smailović;** ja obzirom da se prvi put izlazim za govornicu, pozdravio bih sve prisutne. Počeli smo temu o kompetencijama i stručnostima. Pa svojevremeno ako se sjećam gospodine Jašiću, vi ste bili u Komisiji za obrazovanje od toliko profesora, nastavnika itd., a znamo kakve poslove obavljate unutar obrazovnih ustanova.

**Predsjedavajuća Svjetlana Zamboni -Radovanović;** hajte molim vas nemojte izlaziti iz konteksta.

**Vijećnik Almin Smailović;** da ne ulazimo u te kompetencije, stručnosti i obrazovanja bolje je.

**Predsjedavajuća Svjetlana Zamboni -Radovanović;** molim vas nemojte izlaziti iz konteksta. Govorimo o...gospodin Mujkanović, gospodine Jašiću, upozoravam Vas da ne dobacujete s mjesta.

Gospodin Mujkanović, a onda i doktor Vehabović.

**Vijećnik Arif Mujkanović;** podsjećate me na nekadašnjeg Faruka Hidića, tako je i on znao.

**Predsjedavajuća Svjetlana Zamboni -Radovanović;** hvala lijepo. Shvatit ću to kao kompliment.

**Vijećnik Arif Mujkanović;** evo ovako. Mislim da nije korektno od strane vijećnika SDA ovakav stav, kao što je kolega vijećnik Pero Mamić rekao:“puno vi bolje znate Dragomira Dunđera“. Na poziciji koje je do sada obnašao, ne znam vjerujte, znam da radi u Zenici, u kantonalnoj Ustanovi koja nije kompatibilna po vašem ovaj, njegovoj profesiji. Svesrdno ste podržali i čovjek je gore otišao i radio i ima rezultate. Ovdje se radi o zakonskom dijelu koji je propisao da može čovjek da obavlja. Možda bi moja ruka da je Jasmin Bilić, najvjerovatnije da bi bila podržala. Digla bi se za Jasmina Bilića, međutim ja smatram da će Dragomir Dunđer obavljati dobro svoj posao. Ovdje je jedan drugi problem. Problem je u tome što SDP podržava i ja znam da boli ljudi moji, ali morate



shvatit da je to realnost i da morate prihvatit, a još ću vam jednu stvar reći, u predhodnom mandatu vašem, kolega vi znate da zaista neki direktori nisu imali ni dovoljno stručne spreme, ali su obavljali mjesta direktora i radili su. To je istina. Možda nije istina, ali zaista su radili i dobijali su prolaznost.

**Predsjedavajuća Svjetlana Zamboni -Radovanović;** hvala lijepo. Samo jedna mala digresija. Dakle Dom kulture je Javna ustanova koja ima svoje stručne službe. Domu kulture ne treba ni muzičar, ni profesor, Domu kulture treba menadžer. Dom kulture ima stručnog saradnika za kulturu, za pravne poslove, servis koji obavlja računovodstvene poslove. Njemu treba menadžer, bez obzira šta je završio. Neko ko zna napraviti novac i nastaviti dizati ovu Ustanovu kako je već i bilo. Prvo gospodin Bilić da vam odgovori za pitanje pa onda ako bude još nejasno nešto pitajte. Samo ispucali ste stvarno, koliko ste diskusija. Jel replika neka ili..nemate pravo na diskusiju više. Kome replicirate? Nekome? Morate reći na šta replicirate. Izvolite gospodine Bilić i da završimo ovu raspravu.

**Jasmin Bilić;** evo ovako. Dom kulture kao i svaka ustanova, Uredbom o osnivanju ustanova iz 1992/93/95 godine koja je i dan danas na snazi, propisano je, a dobro je i predsjedavajuća rekla, svaki od vijećnika bi trebao to da zna da svaka ustanova ima svoja Pravila o unutrašnjoj organizaciji, o sistematizaciji, Pravila o zaštiti od požara i druga. Mi ih imamo sedam. Sve su Pravilnici. Evo ovako, Pravilima JU Dom kulture „Edhem Mulabdić“ Maglaj , propisano je da za mjesto, poziciju direktora kandidat mora ispunjavati sljedeće uslove: da ima VII stepen stručne spreme ne piše koje, najmanje 5 godina radnog iskustva, organizacijske sposobnosti, rukovođenje itd.itd. Znači ovaj gospodin to sve ispunjava. Ja Dragomira gospodina, znam 18 godina, a znate ga isto i vi svi. Ja, vjerujte mi, ja ga znam. Jedan od uslova zašto sam ja odustao od kandidature je kada sam vidio da je gospodin Dunder, ja mislim da gospodin Dunder bi to bolje radio. Eto to je to.

**Predsjedavajuća Svjetlana Zamboni -Radovanović;** hvala vam lijepo. Eto to je. Gospodin Vehabović., doktor Vehabović.

**Vijećnik Elvir Vehabović;** tačka dnevnog reda Odluka o davanju saglasnosti na konačno imenovanje direktora JU Dom kulture „Edhem Mulabdić“ Maglaj., kada bude tačka dnevnog reda rad Dom kulture, onda možemo postavljati pitanja o čemu i kad i šta. A mislim da kao vijećnik imam pravo na repliku, kada imam drugačije mišljenje gospodine Jašiću, rekli ste ovdje da imate pravo na svoje mišljenje , pa izgleda da imam i ja.

**Predsjedavajuća Svjetlana Zamboni -Radovanović;** hvala lijepo. Zaključujem raspravu po ovoj tački dnevnog reda. Nema se šta više reći, pred nama se nalazi materijal, Odluka o davanju saglasnosti na konačno imenovanje direktora JU Dom kulture „ Edhem Mulabdić“ Maglaj. Dakle nakon zakonski provedene procedure, na vijeću je da da konačnu saglasnost za imenovanje, te ovu Odluku stavljam na glasanje. Ko je za?

Molim. Ja se izvinjavam ja pauzu nisam dala. Ko je za ? Emina, molim Vas.

Četrnaest. Ko nije prisutan u Sali, molim vas recite mi. Gospodin Ferić nije prisutan.

Ja ne mogu imati deset očiju gospodine Jašiću, zato i imam svoje pomoćnike za ovim stolom, koji mi pomažu da svoju funkciju obavljam kako treba, al'hvala vam na silnim sugestijama koje me uče kako se radi. Baš vam hvala na tome.

**Glasalo za :** Svjetlana Zamboni -Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Elvir Vehabović ( NBL) Pero Mamić(HDZ BH)

**Glasalo protiv ;** Adis Abdurahmanović, Jasmin Begić, Mirsad Bejzić, Safet Jašić, Eldis Kusur, Edin Osmić, Eldin Pehrat, Edin Salatović.(SDA),

**Uzdržani ;** Mustafa Bešić (SBB),

Vijećnik Hajrudin Ferić nije bio prisutan kada se glasalo.

## ZAKLJUČAK

9.1.Usvaja se Odluka o davanju saglasnosti za konačno imenovanje direktora JU Dom kulture „Edhem Mulabdić“ Maglaj

**Predsjedavajuća Svjetlana Zamboni -Radovanović;** prelazimo na narednu tačku dnevnog reda. Evo ako traži neko od Klubova pauzu, može. Evo tehnička pauza, 5 minuta. i da ovo završimo. Nastavljamo s radom.

#### **AD 10. Prijedlog rješenja o utvrđivanju prava svojine u korist Gorčinović Radovana iz Misurića**

**Predsjedavajuća Svjetlana Zamboni -Radovanović;** ove tačke smo imali i sa drugim imenima i prezimenima, dakle iste lokacije, isti postupci sve. Ne znam da li ima potrebe da se daje uvodna riječ. Mislim da ne. Evo izvolite, Vi ste se javili za riječ.

**Vijećnik Eldin Pehrat ;** selamim i pozdravljam sve prisutne. Dakle Klub vijećnika SDA smatra da je ovo jedan u nizu legalizacije bespravne gradnje na državnom zemljištu čime se licima bliskim aktuelnoj vlasti omogućava protuzakonito građenje objekata. S tim u vezi Klub vijećnika SDA neće podržati ovakav i slične prijedloge.

**Predsjedavajuća Svjetlana Zamboni -Radovanović;** hvala lijepo. Evo samo jedna napomena za Zapisnik da do sada nismo imali nikakvu pritužbu u nekom zakonskom smislu vezano za Odluke koje smo donosili za iste predmete, za druga fizička lica. Nedžade vezano za cijenu, jel trebamo mi nešto ovdje kazati, iako stoji da će se u skladu sa Odlukom....možete izvolite. Možda sam trebala prvo Vas prozvati, pa onda...i napomenite me ubuduće uvijek ide prvo stav Komisije pa onda ide diskusija. Nekada zaboravim, ali zaista treba prvo stav Komisije poslušati, pa onda raspravu.

**Nedžad Ćatić;** Prijedlogom ovog Rješenja utvrđuje se pravo svojine na zemljištu ispod garaže. To jeste legalizacija, ali to je u skladu sa članom 61. Zakona o građevinskom zemljištu, koji kaže da se može izvršiti dodjela zemljišta, znači ukoliko je taj objekat predviđen za građenje trenutnom planskom dokumentacijom. I u ovom postupku je utvrđeno to, znači u postupku su učestvovali i urbanista i pravobranilac. U postupku je utvrđeno da je ta garaža predviđena planskom dokumentacijom i za nju se mogu dobiti dozvole. I samo u toj situaciji se i može ovakvo rješenje izdati i predložiti.

**Predsjedavajuća Svjetlana Zamboni -Radovanović;** ma ovo je 100-ta po redu ja mislim.

**Nedžad Ćatić;** drugačije ne bi rješenje ni došlo na ovu tačku. Što se tiče cijene, mi smo tražili stav Komisije za procjenu nekretnina i dobili smo da je 60 KM po metru kvadratnom. I ovim rješenjem je utvrđena i renta i uređenje, znači to je taj član 61. Zakona o građevinskom zemljištu. znači u slučaju kad se može uraditi, odmah se utvrđuje i cijena zemljišta i uređenje zemljišta i renta. I sve to u tome.

**Predsjedavajuća Svjetlana Zamboni -Radovanović;** hvala puno. Zaista smo bezbroj puta o ovome diskutovali. Ima li vijećnika prijavljenih za diskusiju. Nema . Načelnik općine.

**Načelnik općine Mirsad Mahmutagić ;** stalno se trudim da ne slušam iz SDA šta dolazi. Da prešutim. To su nebuloze za nebulozom, greška za greškom ili namjerne neistine. Ovo sada ću kvalifikovati sa namjernom neistinom. Čudi me da je mladi kolega sebi to dozvolio, a da nije proučio materiju, vjerovatno govori u ime Kluba, pošto na kraju svi tako kažu. Nelegalna gradnja i ljudi bliski vlasti. Ljudi moji, garaže izgrađene kad i kako i proces legalizacije garaža teče godinama. Ja vijećnik bio 12 godina, 12 godina je dolazilo na vijeće povremeno oko legalizacije garaže i prodaje zemljišta jer sam isti vlasnik garaže u sjevernom djelu grada morao kupiti poslije zemljište. Dakle, iznesete neistine. Ne pročitate materijal, ali evo šef Službe vam objasnio da je sve zakonito, sve uredu. Da li je Radovan Gorčinović blizak vlasti? A blizak ili ne blizak da li bi čovjeku trebalo zabraniti ili možda vi mislite zato što je Radovan da mu treba zabraniti, da ne može kupiti ono što mu zakonski pripada. Pitajte se kako su građene garaže na općinskom zemljištu pa se poslije kupovalo općinsko zemljište. Prisjetite se nedavno rješenja za izgradnju garaža u centralnom dijelu, gdje je bila licitacija za zemljište sa načelnom urbanističkom saglasnošću, šta se može i graditi i da se gradi. Dođe mi stvarno da vam počnem odgovarati. Evo prešutio sam, sad neću prešutit. Šutio sam iz poštovanja prema načelniku Živinica kojeg lično znam. Pa vi se pozivate na načelnika Živinica, njegov savjetnik uhapšen zbog korupcije. Nemoguće da ne znate i nemoguće da su vam to uzori.

**Predsjedavajuća Svjetlana Zamboni -Radovanović;** nemojte da izlazimo iz konteksta, molim vas načelnice. Evo Klub SDA je iznio svoj stav. Poslušali ste šefa Službe koji je demantovao da je to bilo šta nelegalno. Znači ovo je već 100-a garaža o kojoj se ja izjašnjavam kao vijećnik, na isti način. Na glasanje stavljam dakle Prijedlog Rješenja o utvrđivanju prava svojine u korist Gorčinović Radovana iz Misurića Maglaj kao graditelja garaže na građevinskom zemljištu kojim raspolaže Općina Maglaj. Predložena cijena metra kvadratnog u skladu sa onim što je Komisija dostavila je 60 KM po metru kvadratnom. Ko je za donošenjem ovakve Odluke?

**Glasalo za ;** Svjetlana Zamboni-Radovanović, Elvir Arnautović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Elvir Vehabović ( NBL) Pero Mamić(HDZ BH), Mustafa Bešić (SBB), Hajrudin Fermić (DF),

**Glasalo protiv;** Adis Abdurahmanović, Jasmin Begić, Mirsad Bežić, Safet Jašić, Eldis Kusur, Edin Osmić, Eldin Pehrat, Edin Salatović.(SDA),

**Uzdržanih ;** nema

## ZAKLJUČAK

10.1. Donosi se Rješenje o utvrđivanju prava svojine u korist Gorčinović Radovana iz Misurića, Maglaj, kao graditelja garaže na građevinskom zemljištu kojim raspolaže Općina Maglaj, uz predloženu cijenu za plaćanje naknade za zemljište u iznosu od 60,00 KM po 1 m<sup>2</sup>.

**AD 11. Prijedlog Odluke za dodjelu studentskih stipendija za studente Općine Maglaj za studentsku 2020/2021 godinu.**

**AD 12. Prijedlog Kriterija za dodjelu studentskih stipendija za studente Općine Maglaj za studentsku 2020/2021 godinu.**

**Predsjedavajuća Svjetlana Zamboni -Radovanović;** ja bih objedinila 11. i 12. tačku dnevnog reda ako nemate ništa protiv, dakle možete iznositi svoje stavove i za jedno i drugo. Otvaram raspravu. Eldina je, šefica Službe je ovdje. Treba li uvodničar? Eldina, možete li molim Vas. Nije im jasno zašto 2020/2021. školska godina. Ako možete samo.

**Eldina Mehinagić;** da vas i ja sve pozdravim. Evo 2020/2021. godina mislim da stari vijećnici poprilično znaju da mi uvijek sačekamo sve stipendije da se odrade boračka, kantonalna i onda mi kao Općina donesemo na kraju i na neki način , možda je ružan izraz ,al pokupimo sve one studente koji nisu dobili ni od koga stipendiju pa na neki način oni dobiju od nas. 2020/2021. Godina, jer se radi unazad o stipendiji i to je većinom godinama tako. Mi smo to tako i naslijedili i tako je i bilo već 3-4 godine tako radimo, a evo već početkom novembra će početi stipendije za 2021/2022, godinu. Odnosno boračka, Ministarstvo itd. malo smo ove godine , nismo okasnili al eto zato što je Ministarstvo za obrazovanje kasni sa svojim stipendijama, pa smo i mi na neki način malo sačekali da oni završe pa da i mi svoje odradimo.

**Predsjedavajuća Svjetlana Zamboni -Radovanović;** javljam se za riječ i ja samo kratko.

**Predsjedavajuća Svjetlana Zamboni -Radovanović;** mislim da mi u Općinskom vijeću Maglaj, stvarno možemo biti ponosni na stipendije koje dodjeljujemo našim studentima. Ono što je najvažnije u konačnici kad sve stipendije budu gotove na svim nivoima vlasti pa i ova općinska stipendija jeste da niti jedan student, niti jedan redovan student ne ostane bez stipendije. I to je bila ideja u nekom od ranijih saziva, da sačekamo, da vidimo ko će sve dobiti, jer mi ne možemo pomoći gore na nekom kantonalnom ili drugom nivou, ali na ovaj način kada svi studenti dakle dobiju na nekom od viših nivoa vlasti, svi oni koji ostanu dobiju stipendiju na općinskom nivou. Tako da možemo sa zadovoljstvom reći da svi naši redovni studenti su stipendisti. Svi dobijaju neku od stipendija i mislim da to nama kao vijećnicima može služiti na čast i mislim da ova praksa i nije loša, zato što na taj način se pobrinemo za svako dijete koje studira redovno na fakultetu. Naravno zna se koji su Kriteriji, zato o njima i raspravljamo, govorimo o Odluci i govorimo o

Kriterijima. Svi oni koji zadovolje Kriterije i dobiju stipendiju i niti jedan student dakle ne ostane bez stipendije.

**Dopredsjedavajuća Aida Bašić;** hvala predsjedavajuća. Javlja li se još neko za riječ. Gospodin Begić, izvolite.

**Vijećnik Jasmin Begić;** ne sumnjam u dobru namjeru ovoga, stvarno i to je dobra stvar u potpunosti. Samo je malo nelogično, imamo slučaj gdje student završi studije, ali dobija godinu dana stipendiju.

**Predsjedavajuća Svjetlana Zamboni -Radovanović;** za školsku godinu koju je završio.

**Vijećnik Jasmin Begić;** tako da je malo to nelogično i samo iz tog razloga sam tražio pojašnjenje, jer hajde oni koji studiraju prva, druga, treća, ali kada završiš i onda dobijaš stipendiju godinu dana.

**Predsjedavajuća Svjetlana Zamboni -Radovanović;** ali si te pare već potrošio, znaš. To je kompenzacija. Hvala lijepo. Ma znam, gospodin Begić vidjet ćete ponavljat će se ovo i ubuduće, imat ćemo diskusije. Gospodin Galijašević, repliku je imao. Kome replicirate? Gospodinu Begiću.

**Vijećnik Firuz Galijašević-replika;** a moram samo replicirati. Logično bi bilo da dajemo na kraju, jer ako damo na početku mladi će upisati fakultet, a znamo koliko ih samo upiše fakultet i ne vidi više zgradu fakulteta. Samim tim, mi bi tako morali isplaćivati njima stipendije, a nisu ni odslušali ni jedno predavanje. Ne, ne, kriterij ide na početku. On ispunjava kriterije čim je prijavio se na fakultet, dobio potvrdu da je redovan student, donio ostalu dokumentaciju. Međutim, još nisu ni krenula predavanja, razumijete, nije krenula školska godina zato je logično da se ovako daje na kraju.

**Predsjedavajuća Svjetlana Zamboni -Radovanović;** dobro, gospodin Kusr izvolite.

Dobro, hajte da budemo podrška našim studentima. Nemojte da im otežavamo ionako težak studentski život.

**Vijećnik Eldis Kusr ;** mislim oko ove teme, Odluka o dodjeli stipendija studentima, to ne treba uopšte dilemu nikakvu ni raspravu. Znači i ja sam bio student i ovdje mnogi koji su studirali znaju koliko znači kada dobiješ stipendiju. Stipendija je znači, predviđena za jednu kalendarsku godinu, ali ona se isplati jednokratno, dvokratno, ne znam kakav je mehanizam. Ovo je pohvalno i što kaže predsjedavajuća maloprije, raniji saziv Općinskog vijeća je zaista donio Odluku da se sve sačeka. Znači, da se sačeka Ministarstvo za boračka pitanja, Ministarstvo za obrazovanje, nauku, kulturu i sport, kad sve se to završi tek onda raspisuje Općina konkurs, to jeste Odluku donosi o raspisivanju stipendije i što je pohvalno i što reče kolega Firuz pa jeste možda bolje što je na kraju, jer ima mnogo, ja znam mojih kolega koji upišu fakultet i više se nikad ne pojave na fakultetu. Tako da, za svaku pohvalu ako se može iz Budžeta izdvojiti svakom studentu, vjerujte i 100 maraka je nekad bude dobro došlo, zato što studenti naši pored finansijskih sredstava koje daju roditelji i ovo dođe dobro za svakog studenta. Eto to je to.

**Predsjedavajuća Svjetlana Zamboni -Radovanović;** hvala lijepo. Kažem trebamo biti podrška našim mladim studentima i tako trebamo i da razmišljamo. Ukoliko nemate nikakvih primjedbi na samu Odluku i Kriterije ne bih duljila više diskusiju. Objašnjenje smo dobili od šefice Službe te stavljam i jedno i drugo na glasanje. Znači, **Prijedlog Odluke za dodjelu studentskih stipendija za studente Općine Maglaj za studentsku 2020/2021 godinu i Prijedlog Kriterija za dodjelu studentskih stipendija za studente Općine Maglaj za studentsku 2020/2021 godinu, ko je za ?**

## ZAKLJUČAK

11.1. Usvaja se Odluka za dodjelu studentskih stipendija za studente Općine Maglaj za studentsku 2020/2021 godinu;

## ZAKLJUČAK

12.1. Usvajaju se Kriteriji za dodjelu studentskih stipendija za studente Općine Maglaj za studentsku 2020/2021 godinu;

**Predsjedavajuća Svjetlana Zamboni -Radovanović;** hvala lijepo, dragi studenti imate jednoglasnu podršku Općinskog vijeća i jako mi je drago.

**AD 13. Informacija o stanju i funkcionisanju MZ –a na području Općine Maglaj,**  
**Predsjedavajuća Svjetlana Zamboni -Radovanović;** Šefica Službe je tu. Pauza na zahtjev predsjednika Kluba SDP-a.

**Predsjedavajuća Svjetlana Zamboni -Radovanović;** zamolila bih vas da se vratite na svoja mjesta. Gospodin Ferić, Bešić i Delić. Dakle na 13.-toj tački dnevnog reda se nalazimo Informacija o stanju i funkcionisanju MZ-a na području Općine Maglaj. Prije nego smo otvorili ovu tačku dnevnog reda Klub SDP-a tražio je pauzu. Otvaram raspravu po ovoj Informaciji . Izvolite gospodin Osmić, a onda Smailović.

**Vijećnik Edin Osmić;** evo ja bih vas opet pozdravio. Do sada što je bila moga govora i izlaganja, pretežno je bilo stavovi Kluba SDA, evo nešto sam i ja pripremio pa nakon 8, 10 mjeseci da i ja svoje nešto kažem.

**Predsjedavajuća Svjetlana Zamboni -Radovanović;** iznosite lični stav, gospodine Osmiću,  
**Vijećnik Edin Osmić;** jeste rad MZ-a. Rad u MZ-a što se tiče barem naše konkretne MZ-e jedna od rijetkih MZ-a gdje radimo i saradujemo. Nas je bilo 7 , ostalo nas je 6 pa je tada bilo 4-3 , sada nas je 3-3, što se prilikom rada, nije se nikako ni primjetilo da je bilo 4-3 ili 3-3.

**Predsjedavajuća Svjetlana Zamboni -Radovanović;** da se našalim rezultati utakmice kakve.

**Vijećnik Edin Osmić;** jeste 4 bilo za SDP , 3 za SDA. Ali nije se niti jednog momenta , kao što svi znate nije se odnosilo na rad., pa da ne bih ja nešto malo duljio i bezveze pričao. Nešto bih konkretno, recimo konkretno rad naše MZ-e gdje sam ja u narednom nekom periodu i unazad tih par mjeseci i u razgovorima sa mještanima potencirao dolazak pitke vode. i ta se pitka voda i dan danas spominje, a naročito u zadnjih mjesec dana, gdje mi dolaze ljudi kući i gdje ću najverovatnije ići od kuće do kuće i da napravim da će se ljudi potpisati da idemo u tom pravcu. Ovdje sam napisao neka dva lista, ali evo ta dva lista ne bih ja sada ništa čitao. Konkretno me interesuje prije 20-tak dana sam se htio i obratio javno i Općini i strukturama općinskim da ja i jedna grupa da odemo na razgovor. Znači, unazad 20-tak dana jednostavno nemam ni odgovora niti imam poziva po tom pitanju da s nekim razgovaram. U 2020-toj godini 20.000 maraka je odobreno za našu MZ-u za vodovod, za projekat, u tih 20.000 realizacija nula bodova. U 2021.godini dato je 10.000 , ovo samo navodim konkretno neke stvari. Ništa ni od tih 10.000 što se tiče te realizacije. Realizacija kanalizacije imao sam ovdje rješavanje kanalizacije, prelaska puta i to sada ne bih ovdje iznosio, jer smo i to započeli jednim dijelom koji znaju gdje se ja nalazim i onaj središnji dio možda 20-30 kuća, gdje smo krenuli ja i povjerenik i ostali samoinicijativno neke stvari i krenuli smo kupili smo cijevi, kupili smo sve i to nismo uspjeli završiti. Sada bih molio ovdje ili da mi neko pismeno odgovori ili kaže samo u kojem pravcu da ja idem? Kome da se obratim? Šta da radim po ovome pitanju, jer najverovatnije da ćemo danas i mi imati ponovo sastanak ta grupa neformalnih ljudi, da znamo u kojem pravcu da idemo. Ovdje sam napisao i raspisan je Javni poziv za vodne naknade iz kantona 2.551.000 gdje i tu imam kao nekih obećanja da bi moglo se od tih sredstava moglo dobiti nešto MZ-a. Nas interesuje da neko samo pokrene inicijativu za rješavanje problema ulaska vode u MZ-u. A evo samo još jedan sam primjer našao pošto sam se malo bavio time jedna je MZ –a dobila 143.872 marke za vodu, pa bih eto molio u ime tih svih građana u ime svega, ja bih vam se zahvalio pa da pokušamo nešto riješiti.

**Predsjedavajuća Svjetlana Zamboni -Radovanović;** s govornice molim vas Edo da uđe u Zapisnik.

**Vijećnik Edin Osmić;** povjerenik je Fahir Salkić. Danas je, ja mislim 18-ti ili 19-ti dan jer sam išao sve da ide legalnim putem preko MZ-e povjereniku, te sam zamolio ima grupa i kaže da je odmah sutradan razgovarao, s kim kako ja ne znam. S kim je razgovarao, konkretno povjerenik. Ovo se sve radi preko ovih institucija i hoću da ide sve preko MZ-a. Znači, kada su bili i izbori u MZ, vi svi govorite neko je dobio više, neko manje. Ja sam konkretno dobio 80-90, trebao sam biti predsjednik MZ-e, čovjek je dobio 10,20,30 glasova pa je sada povjerenik MZ-e. Ovo sve što je

kretano prije mjesec dana, ja sam krenuo legalnim putem preko povjerenika. Jučer sam nazvao povjerenika, evo kad ste me već pitali, nisam htio da prozivam nikoga, znači nazvao sam ga konkretno i rekao: "Fahire, ja više neću da idem u tom pravcu. Mene ne smatrajte više da ću biti tu". Evo na kraju nisam mislio ni ovo da govorim, ali da bi vi kao Vijeće, da me uputite kud, šta, kako? Znači, od njega sam dobio to. Čekao sam odgovor 20 dana, nisam...evo sad sam ovo iznio tako da ja jednostavno, da vas upitam kud, šta dalje da bih mogao prenijeti mještanima. Hvala.

**Predsjedavajuća Svjetlana Zamboni -Radovanović;** hvala lijepo. Izvolite načelniče.

**Načelnik općine Mirsad Mahmutagić;** meni je žao, kad mi damo MZ-e u ruke ljudima koji izađu za govornicu i kažu: "ja ne znam". Kad ne znaš, nemoj se ni petljati. Pitam Vas jasno kome ste podnijeli zahtjev? Za koji sastanak? Na koju temu? Da znamo. Da znaju ovdje svi. Da zna javnost, javnost gleda. Trebam vam pročitati ja SMS poruke od vašeg povjerenika Fahira, gdje sam mu odgovorio i rekao: "javite se odmah u Službu kod gospođe Enise Hatičić". Ako gospođa Enisa Hatičić ne skače za svima vama iz svih MZ-a, ko onda skače. Kad izađete recite evo dopis traženja sastanka, nisam dobio sastanak, a ne pričati paušalno i možete vidjeti SMS poruke, ako želite gospodine Osmiću, to je bilo prije neki dan. I dobili uputu idite u Službu, ne trebate sjediti kod načelnika i pričati šta hoćete i tražiti neko obećanje bez argumenata, bez papira, bez bilo čega. Ono što je simptomatično jeste da se pojavite sa inicijativama kada čujete da ide i Općina u tom smjeru, dakle u pripremi je projektni zadatak za projektovanje nastavka, odnosno vode u Liješnici, a govorim nastavka zato što je vodovod prošao, došao do Natrona, napojen Natron i predviđeno da ide izlaz prema MZ Liješnica, odnosno prema kućama u Liješnici. Dakle, tu informaciju imate i zbog toga se pojavite malo populizma da pucate. Onda iznesete ovdje dato je 20.000, dato je 10.000, dajte papir da vidimo kome je dato? Zašto je dato? I ko je to gdje potrošio? Pa da kažemo ljudima ako je Općina nešto odradila, a nije kako treba dajte odmah neka odgovaram, prvo ja pa onda ako ima neko iza mene, nije sporno. Na isti takav sastanak ste došli iz Liješnice, ciljano stranački pa ste napali jednom da vam je potrošeno 80.000 pa vam je gospodin Bešlagić objasnio, ne sjećam se više da li ste Vi gospodine Osmiću bili prisutni. Niste bili prisutni, ok. Vama je iz poniženja doći do načelnika, zato što ste u SDA, ali ne bi Vam bilo iz poniženja da Vam se da novca pa da kažete da SDA gradi. Dakle, Vi izlazite ovdje sa paušalnim stvarima, neprovjerenim stvarima. Ja vas upućujem sve i pozivam vas. Pozvao sam vas nakon konstituirajuće sjednice, sve što mislite kao vijećnici, kao predsjednici MZ-a da trebate surađivati sa administracijom, sa načelnikom bujrum dođite, neće vas niko vratit, naravno pri tome treba biti malo pristojan ne može se uvijek upasti nekome u svako vrijeme i u svakom poslu koji radi. Zato postoje telefoni, postoje e-mail, poruke itd. Dakle, puno paušalnih stvari iznešenih ovdje, a nećete da kažete što ste najavili malo novca, jel došla delegacija SDA i kaže dat ćemo mi novca. Ma da bogdom hoće. Dajte da daju za taj Maglaj više.

**Predsjedavajuća Svjetlana Zamboni -Radovanović;** izvolite, pretpostavljam da je replika. Pošto u principu nemamo dvije-tri rasprave ni predviđene po Poslovniku, nismo nikad ni imali. Ako je replika, ok ako nije. Samo izvolite.

**Vijećnik Edin Osmić-replika;** samo ja ne znam šta sam ovdje...ovo što piše, piše 20.000 da je planirano. Ja nisam rekao da je to neko potrošio. Nisam rekao da su dobijene. Pa načelniče, 20 piše da je trebala realizacija, nije realizovano. Valjda znam šta sam govorio, hajde nebitno.

**Predsjedavajuća Svjetlana Zamboni -Radovanović;** nemojte molim vas dobacivati smjesta.

**Vijećnik Edin Osmić;** nisam ni jednog momenta nikog ni prozivao. Ovdje je samo dobra namjera da se negdje krene u tome pravcu.

**Predsjedavajuća Svjetlana Zamboni -Radovanović;** molim vas načelniče nemojte. Ako budete imali repliku.

**Vijećnik Edin Osmić;** molim vas, ja sam ovdje ušao u Vijeće ako mogu nešto da dam, da doprinesem. Nije mi svrha ni cilj da ja nekoga nešto...

**Predsjedavajuća Svjetlana Zamboni -Radovanović;** čini mi se da stvari treba nazivati samo pravim imenom, ako govorimo o sredstvima. Odakle su, kakva su i kako se zovu.

**Vijećnik Edin Osmić;** ja sam našao, piše 20.000. Nisam rekao ni da je neko potrošio.

**Predsjedavajuća Svjetlana Zamboni -Radovanović;** ali u kapitalnim investicijama. Mi smo tu Odluku donijeli.

**Vijećnik Edin Osmić;** nisam nikad, ni namjera mi nije ni jednog momenta da ovdje nekome govorim ili da blatim. Ali što nekada ispadnu neke stvari kroz moj razgovor, valjda ću se naučiti i ja u toku ovih 4,5,10 godina. Nije mi cilj i namjera ni jednom bila da ja nekom govorim da je potrošio neko ovo.

**Predsjedavajuća Svjetlana Zamboni Radovanović;** dakle u Planu kapitalnih investicija Općine Maglaj, Odluka koju smo mi usvojili, nalazi se taj plan i nalaze se ti iznosi. Da ispravimo, ako je došlo do pogrešne... Hvala lijepo. Prvi se javio za repliku Kusur. Predsjedniče Komisije i te replike treba ukinuti Poslovníkom.

**Vijećnik Eldis Kusur-replika;** repliciram znači.

**Predsjedavajuća Svjetlana Zamboni -Radovanović;** naravno, izvolite.

**Vijećnik Eldis Kusur-replika;** ja znam da je načelnik općine Maglaj, gospodin Mirsad Mahmutagić načelnik svih građana. Nisam dao podršku njemu al je on opet moj načelnik. Načelnice, ja vas molim kao općinski vijećnik da se ponašate malo kulturnije i da se suzdržite od iznošenja nekih ružnih klasifikacija. Što se tiče SDA i sada ja kao predsjednik općinske organizacije tvrdim i govorim sve što vi budete tražili kao općinska administracija iz kantona, iz Federacije, sa viših nivoa SDA nikad neće biti prepreka da se ostvare i da se realizuju ta sredstva na području općine Maglaj. Vi znate da je na početku, nekad možda 3-4 sjednica bio Izvještaj o realizaciji Budžeta, da je sam kanton u Maglaj uložio 960.000 maraka po raznim osnovama, a da je Vlada Federacije oko nekih 650.000 KM. Znaete da se dešavalo da je došlo za poljoprivredu pa se nije realiziralo pa se vratilo nekih 40-tak hiljada. Ja Vas s ovog mjesta molim da se ponašate prikladno, Vi ste načelnik, načelnik svih građana i molim Vas da kad Klub SDA ili neki vijećnik iz SDA iznosi, imate malo strpljenja, a ne da budete nervozni.

**Predsjedavajuća Svjetlana Zamboni -Radovanović;** hvala lijepo. Evo još jednom replika načelnik.

**Načelnik Mirsad Mahmutagić-replika;** nema nervoze, ja tako govorim. Govorim ozbiljno i konkretno. Lijepo je to čuti da sam i vaš načelnik, da se još samo i tako ponašate to bilo super. Brljate i brkate pojmove. Dao kanton, dala Federacija. To je novac naših građana, to nije novac SDA i nije novac SDP-a i taj novac dobijaju sve općine u kantonu, sve općine u Federaciji. Ali ja vas pozivam da pogledate projekte koji zavise od SDA, na ovim nivoima koliko općina Maglaj dobije, a koliko dobiju druge općine i nije to samo problem sa našom općinom, ima još općina. Morate shvatiti da je to novac građana, da je to novac od općina, kantona, Federacije do države. Nekako ste se zaludili tim svojtanjem, valjda vam to od predsjednika ide da je nešto lično. Nema lično. Ali nemojte da više kuhamo, da vam kažem na kojim projektima konkretno čak i ljudi iz SDA iz Maglaj su se borili da ne dobije Općina Maglaj, jer to je vaš način političke borbe, a taj vaš način političke borbe sveo vas je na to što jeste u rasulu ste i još više ćete biti u rasulu, čast pojedinim izuzecima koji ovdje sjede.

**Predsjedavajuća Svjetlana Zamboni -Radovanović;** mislim da ne trebamo otvarati ...hajte molim vas da i ja..gospodine Jašiću nisam vas prozvala, ne možete izaći dok vas ne prozovem. Molim vas nemojte da otvaramo teme koje smo već jednom razglabali kada smo govorili o Budžetu. Sve ovo je ispričano kad je bio Budžet, kad smo imali Nacrt i Prijedlog Budžeta , sve ste ovo svi manje-više rekli. Znači, nemojte da otvaramo temu mimo informacije o MZ-a. Izvolite gospodine Jašić.

Hajmo se baviti sobom.

**Vijećnik Safet Jašić;** gledajte, ja sam i mislio u ovome pravcu da sugerišem bolan, odmah ste trebali znači, tačka dnevnog reda Informacija o stanju i funkcionisanju MZ-a na području općine Maglaj i odmah na početku ste mogli....

**Predsjedavajuća Svjetlana Zamboni -Radovanović;** zato što se začačka iz vašeg Kluba.

**Vijećnik Safet Jašić;** i onda ovaj SDA, onaj SDP rekao ovo, rekao ono itd. Danas je tačka dnevnog reda , izvolite usmjerite.

**Predsjedavajuća Svjetlana Zamboni -Radovanović;** hvala lijepo gospodine Jašiću što me podržavate. Smailović se davno javio za riječ. Ko ima repliku, gospodin Bradarić. Hajte ljudi da budemo konkretni, da radimo.

**Vijećnik Mirza Bradarić;** ja moram zaista malo. Ovo je, hajde ne mogu tek tako nazvati čista replika ovo je samo samo dopuna kolegi Osmiću. Ja i on smo zaista imali jedno uzajamno poštovanje, međutim ja nisam, kolega Osmić je član vijeća MZ-e. Jeste još uvijek član? Ja razumijem da opozicija treba kritikovati, to je jednostavno zadatak opozicije, al zaista treba kritikovati realno. Ja sam nekad prije 6-7 godina bio u vijeću MZ-e Liješnica, sada tog vijeća nema, uvedeno je povjereništvo. Ja zaista ovom prilikom želim da čestitam povjereniku Fahiru Salkiću na zaista njegovoj borbi od početka gore do kraja MZ-e, koji zaista svoje i vrijeme i svoj lični privatni novac izdaje za rješavanje tih kojekakvih stvari itd. Ovo što Vi spominjete problem vodosnabdjevanja u MZ Liješnica, zaista je ogroman problem. Ogromna MZ-a, blizu fabrike Natron itd. i ja vjerujem krenulo je tim putem da će u nekom skorijem periodu taj problem biti riješen, ali isto tako kada kritikujete pa bio bi red da se nekad i pohvali nešto za neke stvari ako su urađene, pozitivno urađene stvari. Evo gospodin Osmić zna, u predjelu tamo u predjelu Osmića, gdje je i Vaša porodična kuća, gdje i ja dolazim itd, ogroman je problem bio zadnjih par godina. U zadnjih 10-15 godina problem izljevanja rijeke Liješnice na području Johvaka. To Vi jako dobro znate, isto tako ja sad ovom prilikom, pošto sam involviran gore u rad, u problematiku u MZ Liješnica, želim da se zahvalim načelniku na pomoći koju je pružio prije nekih 15-tak dana, kako bi počeli sa sanacijom korita rijeke Liješnice, na onom području Johvaka, kako bi zaista ljudi malo mirnije spavali u ovom nadolazećem periodu, kada je više padavina itd. Znae vi jako dobro da je dobar dio onog korita saniran i ide i dalje sanacija tog korita, a ono što je po projektu predviđeno ja se iskreno nadam, imamo priliku da kandidujemo to vodne naknade oko 250.000 maraka treba pa evo i ja sad vas sve molim, evo od predsjednika Kluba, od predsjednika SDA i svih vas vijećnika sve ono zaista što Općina Maglaj bude kandidovala za vodne naknade, a ima jako puno problema, ima tih stvari da se može kandidovati, evo ja vas ovom prilikom molim pomozite nam svima kako bismo tu problematiku pokušali, ne radi Mirze Bradarića, nego radi onih ljudi gore koji gravitiraju na području MZ Liješnica uz samo korito rijeke. Kako ljudi mogu i mirnije spavati itd. itd. Eto ne radi Mirze Bradarića, nego radi svih ostalih.

**Predsjedavajuća Svjetlana Zamboni -Radovanović;** samo malo, ja moram, izvinite svi izvinite ovdje, ali tačka dnevnog reda se zove Informacija o stanju i funkcionisanju MZ-a na području Općine Maglaj. Ovdje imamo određenu problematiku koja se tiče funkcionisanja MZ-e, kapitalne investicije raspravljali, usvojili, donijeli Odluku, samo malo molim vas hajte da ne pričamo sada o projektima kada imamo problem u funkcionisanju MZ-a, a ne koja će se kapitalna investicija realizovati ili ne. Hajmo malo se vratiti, a materijal i ovo što nam Služba preporučuje u Zaključku, da vidimo šta ćemo s tim. A koje ćete vi projekte raditi, to smo raspravljali na nekoj drugoj sjednici kad smo govorili o sredstvima itd. Hajte molim vas da se što se tiče neformalnih grupa, moja preporuka kao predsjedavajuće vjerujte mi i ja kad komuniciram sa Općinom protokol, pečat protokola, papir evo ga, znači, fizička lica itd.tako da, koja je ovo diskusija već po redu? Onda se to uokviri pa se iznese sa argumentima, papirima i dokumentacijom.

**Vijećnik Edin Osmić;** ja sam ovdje prozvan da sam nekog kritikovao.

**Predsjedavajuća Svjetlana Zamboni -Radovanović;** nemojte se vraćati na to molim Vas gospodine Osmiću, mi se poštujemo.

**Vijećnik Edin Osmić;** ovdje ispada da sam ja protiv nekoga nešto rekao. Meni je samo, MZ Liješnica nema ni projekta. Ja samo tražim...

**Predsjedavajuća Svjetlana Zamboni -Radovanović;** ama nije to problematika o kojoj raspravljamo.

**Vijećnik Edin Osmić;** spominje se i Fahir, ja nisam Fahira...Fahir je jedan od.. moram da kažem da ne ide u negativnom kontekstu da sam ja protiv nekoga nešto rekao. Ne daj Bože.

**Predsjedavajuća Svjetlana Zamboni -Radovanović;** hajte molim vas da riješimo problem funkcionisanja MZ-a, jasno nam je šefica Službe napisala šta je problem u funkcionisanju. Da vidimo šta ćemo s tim. Ko se prvi javio? Smailović, pa onda vi gospodine Begić:



Hajte da se vratimo na temu, da riješavamo problem. Nemojte otvarati nove teme o kojima smo već i ranije razgovarali i znamo da su kamen spoticanja. Hajmo da profunkcionišu MZ-e.

**Vijećnik Almin Smailović;** ja ću se vratiti na ovu tačku dnevnog reda kako stoji Informacija o stanju i funkcionisanju MZ-a na području općine Maglaj, pa imamo ovdje zadnji dio gdje se kaže Općinsko vijeće Maglaj donosi izmjenu člana 3.Odluke o raspisivanju i izboru članova vijeća MZ-e, da ne čitam sada sve. Da je stav Kluba vijećnika SDP-a da se ova Odluka prolongira, da se njen rok koji je dat do 30.10. prolongira do daljnjeg, zavisno od MZ-e. Zašto to govorim, u ovoj Informaciji je dosta toga navedeno, zašto bi se trebala ova Odluka prolongirati. Između ostalog je i godina i ova pandemije, zatim nezainteresovanost građana itd.itd. Iz tih razloga tražimo da se ova Odluka prolongira, ali neka MZ-e koje mogu organizovati zborove, koje procijene da mogu organizovati Zbor građana, provesti ovu Odluku, neka provedu, ali da ne stoji rok do 30.10. da se u Odluci navede do daljnjeg. To će sada biti interna stvar unutar MZ-a, kako će oni organizovati vezano za rokove svoje zborove građana itd.

**Predsjedavajuća Svjetlana Zamboni -Radovanović;** moje pitanje samo za predsjednika Komisije za Statut i Poslovnik, da li bi ovaj Prijedlog koji se nalazi na kraju ovog materijala trebao proći kroz vašu Komisiju? To me samo zanima. Evo razmišljam o Zaključku koji slijedi nakon diskusije. Hvala Vam. Samo malo, ima prije vas gospodin Begić. Pa šta ću ja ljudi se javljaju za riječ, ne mogu ja vijećnicima oduzeti pravo da govore, ali Informacija o funkcionisanju MZ-a.

**Vijećnik Jasmin Begić;** hajde da se vratimo konačno na dnevni red i Informaciju o stanju i funkcionisanju MZ-a. Svjedoci smo toga da zadnje 2-3 godine stvarno MZ-e ne funkcionišu. Mi svi dolazimo iz nekih MZ-a, i svjedoci smo toga da to stvara velike probleme ljudima koji žive u tim MZ-a. Samo neorganizovanje zborova i neimenovanje vijeća MZ-a i predsjednika, stvara probleme i stvara na kraju krajeva zakonske probleme, jer ovo je pitanje da li se ovo sve radi po zakonu. Neću ja da ulazim sada u to da mi to preispitujemo i ovo i ono, cilj nam je jedan znači da MZ-e rade. Ako nam je cilj da MZ rade, ja bih stvarno zamolio šefa Službe, da nam konačno da datum do kada će se organizovati zborovi i do kada će barem pola MZ-a imati svoje legalno izabrane organe vlasti. Jer vidimo da ovo stvarno više ne može ovako funkcionisati 90 dana pa 90 dana, dajte da organizujemo zborove bez obzira sad po Statutima ja mislim MZ-a jednom ako nije bilo kvoruma, na drugoj sjednici se mogu izabrati organi bez obzira koliko dođe. Dajte da u tom pogledu uradimo i ne bih prolongirao ništa iz razloga tog koje MZ-e ne budu radile do ovog roka nije problem. Lakše je raditi sa tri MZ-e koje nisu uradile nego sa dvadeset i kusur.

**Predsjedavajuća Svjetlana Zamboni-Radovanović;** gospodin Ferić, pa onda Abdurahmanović.

**Vijećnik Hajrudin Ferić;** razmišljam da odustanem od diskusije nakon prijedloga gospodina Smailovića s jedne strane, a Jaska s druge strane. Ja jesam ovu Informaciju tako shvatio kao jednu dobru, zaista analitički, hronološki poredanu odnosno zbir podataka i činjenica koje pokazuju kako je stanje u MZ-a, gdje ste svi to već i iznijeli i da nakon toga da na osnovu te informacije izvučemo nešto što bi trebalo da bude efektno, efikasno u ovom narednom periodu. Da izađemo iz ove velike krize u kojoj se nalazi funkcionisanje MZ-a. Ovaj, slušajući naravno ove sve diskusije, zaista jesam bio za ovaj Prijedlog gospodina Almina Smailovića, da se prolongira. Pa sam htio da predložim makar hajmo na iduću sjednicu Općinskog vijeća da donesemo Uputstvo o provođenju sa 3-4 člana, neka stoji to Uputstvo kako da se provede, a onda naravno kad se steknu određeni uslovi da se donese Odluka o izborima. Iskreno rečeno, sad ne znam šta bih, ali jesam za to da evo preporučim, zaista se Služba potrudila da iznese sve ove probleme i znam i ja da na terenu ima zaista puno problema u funkcionisanju. Hajde da polako kažemo svjesni ovdje činjenice da ne možemo to uraditi brzo, ali da uzmemo neki rok od 6 mjeseci ili godinu dana da konačno završimo to da imamo legalno funkcionisanje vijeća MZ-a tamo gdje je to moguće, tamo gdje nije, a ima MZ-a tipa Donjeg Rakovca gdje ljudi traže i mole već godinama da se prisajedine drugoj MZ, da za njih tražimo nekad kasnije al da omogućimo svim onim MZ-a koje mogu da legalno, regularno provedu izbore i da rade i saraduju sa Općinom i realizuju projekte. Moj konkretan prijedlog je

prihvaćam ono što je gospodin Smailović predložio, ali da evo sami sebe na neki način zadužimo da donesemo to Uputstvo o provođenju izbora na narednoj sjednici pa da vidimo poslije toga šta ćemo dalje. Ja lično jesam za to da se riješi, čak sam htio evo u pripremi ove, htio sam da predložim neku kratku pauzu pa da se i Odluka o raspisivanju izbora, da ima dva člana u kojima će se reći raspisuje se, zadatak je taj, Služba treba da dostavi Vijeću nakon što se završi nakon tog roka i Uputstvo od 3 člana, dužni ste poštovati epidemiološke uslove, dužni ste dobiti potpise punovažnih građana koji su prisutni kako bi se dokazala i broj 3. Dužni ste da ogласite to na bilo koji način, 5 ili 7 dana prije sazivanja zborova. Međutim to sada povlačim.

**Predsjedavajuća Svjetlana Zamboni -Radovanović;** samo malo. Nemojte molim vas. Hajte da ne razgovaramo preko stolova. Imamo ovdje još se neko javljao za riječ. Naravno gospodin Jašić, MZ-e omiljena tema, izvolite.

**Vijećnik Safet Jašić;** žao mi je, nisam slušao ove predhodne diskusije po pitanju MZ-a. Mi iz Kluba imamo stav, svoje viđenje po ovome. Malo ću doznati šta je bilo prije mene. Ono što nas zanima jeste ako bi išli u izbore sada da se provedu do 30.10. kako je planirano po kojim pravilima ćemo, jel to Statut 2011. ili je neki drugi Statut, ali mislim da smo najbliži onom Statutu i ne morate čitati onaj Statut iz 2011-te, mogu se pravila izvaditi iz ovoga Statuta, jer on je najbliži, ona nam je najrelevantniji da se Izbori provedu pa sad u kojem roku ja nisam čuo, čuo sam da ima prijedlog da se to sada malo odgodi. Znači, pravila po kojem će se Statutu vršiti Izbori u MZ-a. Statut iz 2011. mislim da je on sasvim upotrebljiv i da možemo po njemu raditi ako budu trebale eventualno neke sitne stvari da se ubace samo u toku izbora neka Komisija ili Služba neka urade ne bi imao niko ništa protiv. Tu u ovome Statutu se lijepo govori prva stvar koju treba uraditi jeste zakazati Zbor, a u tom Statutu stoji da je to 7 dana prije održavanja Zbora, znači 7 dana se mora plakirati ili na još neki drugi način obavijestiti građanastvo da je Zbor zakazan tada i tad. Drugo ako se dogodi Zbor nakon 7 dana i ima kvorum, postoji kvorum, znači prije toga se formira Radno tijelo ili Izborna komisija što je gospodin Fermić htio samo izmijeniti. Nije to ništa strašno, to isto dođe. Znači, Radno tijelo od najmanje 3 člana koje konstatuje da li postoji kvorum ili ne. Ako ne postoji kvorum znači, dužni su da kažu za današnji zbor građana nemamo kvorum, zakazuje se sljedeći zbor građana i ponovo se plakira i to je na prvom zboru tih 10 % famoznih od broja glasača u mjestu gdje se vrše izbori. Drugi izbori ide 50 glasača u većim MZ-a odnosno 30 u onim malo manjim. To je drugi zbor, ako hoćemo, ali ja tražim da držimo ovoga da to provedemo i da niko 4 godine nema pravo da prigovara kako su provedeni izbori. Znači, drugi Zbor je 50 u većim MZ-a preko 1000 glasača, a u manjim MZ-a je 30. Dogodi se drugi Zbor, ima 50 glasača, ljudi izglasaju izaberu Vijeće ili 30. Ne dogodi se ponovo onda je treći puta ko dođe, ako su zaista toliko nezainteresovani građani i da treći puta ne dođu, onda nema smisla. Ima MZ-a, ima građana gdje su dobro zainteresovani i neka ljudi provedu izbore kako je Statutom propisano. Smatram, da jer su ovo sve između ovih Statuta od 2011 i da ovo treba primijeniti i neće se niko ljutiti i građani će moći da razmisle o tome da 7 dana stoji obavijest o samom Zboru. Još što stoji u Statutu jeste javno ili tajno. Sve MZ-e koje imaju uslove za tajno glasanje mogu i tako, a one koje nemaju neke adekvatne prostore mogu izvršiti izbore javno. Dalje, na istom tom Zboru kad se formira tih nekih ako ide 7 članova u vijeće u većim MZ-a u manjim ide 5. treba lista biti daleko veća, znači treba biti još toliko kandidata najmanje pola od ovoga u slučaju odustajanja itd. Znači, to je otprilike što se može isti dan tako smo praktikovali može se održati konstituirajuća sjednica vijeća MZ-e gdje se mogu birati javno ili tajno, mi smo uvijek birali tajno kad je to bilo u pitanju. Znači, predsjednik vijeća MZ-e, zamjenik i u tome su potpisnici sredstava i za jedan dan se to sve završi. Tako smo mi radili do sada, zaista legalno, transparentno uvijek bilo i nije bilo ljutnje. Tako je bilo i posljednji Zbor koji nije nigdje održan osim u našoj MZ, ali eto nećemo se vraćati na to. Ovo je ono čega bismo se trebali pridržavati i idemo u Izbore do 30.10. da se završe. Nemojte da idemo bez nečega, bez pravila, nepoštivanja Statuta. Evo ja telefonom nazvao, došlo nekoliko ljudi. Mislim da to nije korektno, nemojte nas izazivati da idemo na sve Zborove redom. Ovo treba sve poništiti što je do sada bilo. Svi zajedno idemo u izbore, prema tome...to je otprilike što ja imam da kažem.

**Predsjedavajuća Svjetlana Zamboni -Radovanović;** pošto stvarno o ovim MZ-a već prekomjerno mnogo govorimo i nismo do sada uradili ono što nam je bila želja. Mislim da ovo što je gospodin Fermić izašao i sugerisao da se naprave Uputstva za provođenje izbora, uvažavajući sve vaše sugestije koje ste iznijeli vezano za održavanje zborova građana itd .mislim da uz prijedlog SDP-a da se to još malo pomjeri kako bi se dalo vremena Službi i održavanju još jedne sjednice Općinskog vijeća koja bi razmotrila provođenje tih koraka. Da možemo dobro razmotriti te korake koji bi bili provedeni, a da zadovoljimo sve ono što Statut nalaže. Ja evo preporučujem da uvažimo Prijedlog Kluba SDP-a, a da ove sugestije koje je iznio gospodin Fermić da se Službi daju da se pripreme ti koraci, uz pomoć i vaše Komisije na kraju krajeva, jer ste vi Komisija za Statut i Poslovnik. Šefica Službe, a oprostite gospodin Galijašević, hajte da završimo. Klub je već iznio prijedlog, koraci za provođenje. Hajde da skratimo, opet nećemo reći ništa osim ovoga što je već rečeno.

**Vijećnik Firuz Galijašević;** prvo ću da čestitam prvom novoizabranom predsjedniku MZ-e na uspješno održanom Zboru građana Samiru Fetiću u ovo doba korone. Ja sam podnosio vijećničku inicijativu vezano je za izmjenu člana 100. Statuta Općine Maglaj, ovo je sada samo diskusija koja ne bi trebala da utiče na ovo sada planirano održavanje svih Zborova građana.

**Predsjedavajuća Svjetlana Zamboni -Radovanović;** uputite to na Komisiju za Statut i Poslovnik i neka oni razmotre Vašu inicijativu.

**Vijećnik Firuz Galijašević;** ovo je moja diskusija i imam pravo na diskusiju. Ja ću sada u ovoj svojoj diskusiji da pročitam dio svoje vijećničke inicijative koju sam podnio nedavno, evo ovako Prijedlog mog rješenja za način izbora organa u MZ-a, može ovo biti kostur za neko buduće odlučivanje eto kako ćemo raditi dalje. Član 100. treba da glasi :“Vijeće MZ-e biraju građani sa područja MZ-e koji imaju biračko pravo i prebivalište na teritorij MZ-e. Izbor članova vijeća MZ-e vršit će se na osnovu srazmjernog broja osvojenih glasova za Općinsko vijeće svake političke stranke odnosno nezavisnog kandidata na području MZ-e. Mandat članova vijeća MZ-e traje četiri godine. Za članove vijeća MZ-e mogu biti predloženi građani sa prebivalištem na području te MZ-e a upisani su u birački spisak te MZ-e. Prijedlog kandidata za člana Vijeća MZ-e podnose politički subjekti koji djeluju na području MZ-e i to u roku od 60 dana od dana održanih izbora za Općinsko vijeće. Prilikom predlaganja i izbora članova vijeća MZ-e mora se voditi računa da sastav članova vijeća odražava približno nacionalnu strukturu stanovništva, te da spolovi budu ravnopravno zastupljeni. Znači, ovo je samo, imao sam želju da ovo bude moja diskusija i da to bude neki kažem kostur za pravljenje novog načina održavanja, odnosno organizovanja MZ-a.

**Predsjedavajuća Svjetlana Zamboni -Radovanović;** dobro, nećemo se izjašnjavati o toj inicijativi, znate da inicijative idu svojim slijedom kome se prosljeđuju, ko ih razmatra tako da vi ste i rekli želite samo da to pročitate ali nije prijedlog za ovu tačku dnevnog reda. Evo zamolila bih šeficu Službe da nam se sada ona obrati. Znam da je ovo jedna od omiljenih tema.

**Eldina Mehinagić;** ja ću samo da vam kažem. Prvo ću da vas zamolim, zaista. Dobili ste jednu Informaciju. Nekako smo je pokušali objediniti, hvala vam na tome što ste vidjeli i uvidjeli da zaista smo se potrudili koliko smo mogli, na osnovu informacija sa kojima smo raspolagali uraditi Informaciju i to vam dovoljno govori. Zaista imamo težak posao kada su u pitanju MZ-e, ali nekako mi ne funkcionišemo na način koji trebamo kao Služba, jer nemamo MZ-a. Ja bih stvarno zamolila da mi ne idemo dalje u nekakve procedure donošenja nekih novih pravila, nekih novih sistema jer mi smo ovo odradili na način kako je propisano normativno pravnim aktima koje je donijelo i nadležne institucije Federacije, a bogami i vi sami kao vijećnici Odlukom o osnivanju i potvrđivanju MZ-a, pa samim tim i Statutom Općine Maglaj. Ja bih zaista zamolila vas, da mi donesemo Odluku da se krene u tu priču sa izborom i imenovanjem, jer Služba ima problem, Općina ima problem, mi ne možemo aplicirati za projekte kod ovoga jer neće oni sa povjerenicima da rade. Mi ne možemo da radimo, ne možemo uvesti Registar. Pojedine MZ-e nemaju mogućnosti da dobijaju neke stvari koje trebaju da dobiju, jer ih nismo uveli u Registar. Vjerovali ili ne da do skora MZ-e nisu mogle dobiti nove ID brojeve, zahvaljujući saradnji koju mi imamo sa Poreskom upravom i sa Statistikom, prijateljima sa kojima smo se nekako upoznali, oni su nam brzinski odradili ID brojeve. Ljudi do jučer nisu imali žiro-računa u bankama. Svako drugo odugovlačenje

pravi problem i MZ-a i nama. Ja vam samo mogu reći, da na osnovu dokumenata normativno pravnih akata koji su doneseni mi smo dali prijedlog da se ide u izbor i imenovanje i ovo je po pravilima po kojima već postoji. Kakva su takva su, možemo im naći hiljadu zamjerki, ali su naša i bolje ikakvo pravilo nego nikakvo. Svako drugo oduživanje, čekanje, imenovanje Komisija, da budem iskrena i Pravilnika nama smeta, jer morate i to da znate da je u pripremi novi Zakon o principima lokalne samouprave i tu će biti precizno sve definisano kako i na koji način se vrši izbor i imenovanje rukovodstva MZ-a. Mislim da će biti na način kao da su organizuju lokalni izbori, takav će biti princip i procedure i pravilnici. Ja vas stvarno molim kao šef Službe da to završimo i mogu samo da kažem da smo stvarno Prijedlog odradili i da smo sve radili kako je napisano po pravilima koje trenutno mi imamo.

**Predsjedavajuća Svjetlana Zamboni -Radovanović;** u principu ono što Vi sugerirate jeste da se uradi u skladu sa materijalom ?

**Eldina Mehinagić;** da se donese zaključak, da se trenutne procedure imenovanja novog rukovodstva. Nama u novembru mjesecu ističe mandat ovim povjerenicima, mislim 3.novembra. Ako hoćete da mi produžujemo, produžite kako god hoćete. Znači, opet ako odužimo mi moramo opet imenovati rukovodstvo novo, povjerenike. Ko do tada ispoštuje, ispoštuje. Ko ne ispoštuje imenovat ćemo nove, pa neka idu. Mi imamo prijedloge donatora da radimo sa MZ-a ne možemo krenuti u priču dok ih ne uvedemo u Registar i dok ne imenujemo Vijeće. Ja vas stvarno molim da to jednom, mi tri godine o tome pričamo. Ako ništa bar zbog mene, ovo je malo privatno.

**Predsjedavajuća Svjetlana Zamboni –Radovanović,** evo mislim da je jasan stav Službe. Ja vam dajem pauzu od 5 minuta. Malo porazgovarajte unutar svojih Klubova, odnosno jedni s drugima. Evo šefica je objasnila šta može postati problem, šta jeste i nije i projekti i sve što čeka. Evo 5 minuta pauze da usaglasite stavove.

Treba nam šefica Službe zato što je rekla da će ona iznijeti Prijedlog nakon ove pauze o kojem ćemo se mi očitati. Samo jedno malo upozorenje, u tom dijelu zgrade je zabranjeno pušenje, pa vas molim da i poštujuete postavljene znakove. Cigarete palite na terasi ovog objekta.

Evo nakon ove pauze šefica Službe će iznijeti Prijedlog. Molim vas da pažljivo slušate.

Mislim da će objediniti sve ovo.

**Eldina Mehinagić;** evo jedan sam uslov ispoštovala. Ovako ja imam Prijedlog kao šef Službe da bude ovaj zaključak :“ Općinsko vijeće Maglaj da donese izmjenu člana 3. Odluke o raspisivanju izbora za članove vijeća MZ-a na području općine Maglaj broj :02-04-1-40/20 od 22.02.2020.godine pa Službene novine, pa dalje taj član 3. stoji ovako: 'Izbore u MZ Općine Maglaj provesti po važećim normativno pravnim aktima koje regulišu oblast MZ-a, po mogućnosti do isteka mandata imenovanih povjerenika. U onim MZ-a u kojima se to ne bude realizovalo nakon ponovnog imenovanja povjerenika MZ-a isti će dobiti obavezu da to urade u što kraćem roku.'“ Nismo dali taj rok, rekli smo u što kraćem roku.

**Predsjedavajuća Svjetlana Zamboni -Radovanović;** evo ja mislim da ovo miri, gledam u predsjednike Klubova, mislim da ovo miri diskusiju koja je vođena vezano za MZ-e. Te stavljam ovakav Prijedlog iznesen od strane šefice Službe na glasanje.

Ko je za ?

Protiv?

Uzdržan ?

Ja mislim da je ovo prvi puta da donesemo Odluku o MZ-a jednoglasno, te vam na tome i čestitam.

## ZAKLJUČAK

13.1. Prima se k znanju Informacija o stanju i funkcionisanju MZ-a na području Općine Maglaj;

13.2. Donosi se izmjena člana 3. Odluke o raspisivanju izbora za članove vijeća mjesnih zajednica na području općine Maglaj, broj.02-04-1-40/20 od 20.02.2020.godine („Službene novine Općine Maglaj“, broj:2/20) koja glasi:

„Izbore u mjesnim zajednicama općine Maglaj provesti po važećim normativno pravnim aktima koji regulišu oblast mjesnih zajednica, po mogućnosti do isteka mandata imenovanih povjerenika. U onim

mjesnim zajednicama u kojima se to ne bude realizovalo, nakon ponovnog imenovanja povjerenika mjesnih zajednica, isti će dobiti obavezu da to urade do kraja mandata uz poštivanje epidemioloških mjera.“

#### **AD 14. Informacija o stanju obrta, malog i srednjeg poduzetništva na području Općine Maglaj,**

**Predsjedavajuća Svjetlana Zamboni -Radovanović;** gospodin Ferhat Bradarić je tu, materijal je dostavljen na vrijeme. Vrlo je detaljan i pregledan. Evo da vidim treba li uvodničar nešto prvo reći, da li ima potrebe ili da ponudite odgovore jer je stvarno detaljano sve urađeno. Gospodin Galijašević je prvi, pa gospodin Salatović.

**Vijećnik Firuz Galijašević;** moram i ja pohvaliti ovu Informaciju kao dobro urađenu, baš onako po mom ćejfu. Vidio sam ovdje podatke od Federalnog zavoda za statistiku koji baš i nisu tačni. Federalni zavod za statistiku kaže, pročitat ću samo statističke podatke neke za Maglaj, da je stopa nezaposlenosti u Maglaju 47,43 %, oni su došli do tog podatka tako što su sabrali nezaposlene i zaposlene. Ustvari stopa nezaposlenosti je udio nezaposlenih u radno sposobnom stanovništvu. Tako da je prava stopa nezaposlenosti za 2020 godinu 24,54 % , a da ono što su oni računali je ustvari samo relativna nezaposlenost. Znači, relativna nezaposlenost je udio zaposlenih i nezaposlenih. Udio nezaposlenih u nezaposlenim i zaposlenim. Niste razumjeli, ali nema veze. Ja sam rekao tačno kako ide. Na današnji dan je stopa nezaposlenosti ono što sam ja vidio iz nekih svojih izvora. Izvor je naravno Služba za zapošljavanje ZE-DO kantona, Biro Maglaj broj nezaposlenih jutros i zaposlenih na području općine Maglaj danas je relativna nezaposlenost 42,22 %, jer smo imali na kraju 2020-te godine po podacima Federalnog zavoda za statistiku imali smo 4311 zaposlenih na području općine Maglaj a danas 5087, to su podaci od Porezne uprave. Iako u ovom broju zaposlenih mislim da ne stoje zaposleni, svi naši zaposleni u zemljama EU ili u inostranstvu, tako da bi i relativna stopa nezaposlenosti bila manja. Moja sugestija bi bila, mislim da bi bilo dobro da u sljedećoj Informaciji bude malo više poređenja naše općine sa samom sobom u posljednjih 5 godina, primjer stopa nezaposlenosti, relativna nezaposlenost, broj zaposlenih i prosječna neto plaća i sl. Hvala.

**Predsjedavajuća Svjetlana Zamboni -Radovanović;** hvala lijepo. Gospodin Salatović,

**Vijećnik Edin Salatović;** i ja bih pohvalio Informaciju, zaista kao temeljitu i imao bih samo jedno pitanje vezano za projekte Start-up biznisa. Koliko se sjećam već kad se radilo na prošlim Vijećima mi smo tražili informaciju koliko je tih Start-up biznisa uspjelo da opstane u proteklom periodu. Mislim da smo čak i bili i pozicija i opozicija i da smo tražili tu informaciju, međutim nikad nam do sada nije još dostavljena ta informacija. Ono što mislim da je taj projekat jako dobar da ga treba nastaviti koliko znam u ovom periodu u Budžetu za 2021.godinu su predviđena sredstva za nastavak tog projekta. Mislimo kao Klub vijećnika da je to jedno od dobrih ekonomskih rješenja na području općine Maglaj. Ono što bih samo htio da pitam onog ko je dao ovu Informaciju, broj zaposlenih osoba je na području općine Maglaj je 4311, manje za 210 u odnosu za 2019.godinu, to otprilike dođe negdje oko 5 % jel tako , a na drugoj strani 7. Kaže u 2020-toj godini u FBiH prosječni mjesečni broj nezaposlenih lica je iznosio 328.000 što je više od 2,6 % u odnosu na 2019.godinu.ako sam ja dobro sračunao to znači da smo mi otprilike u Maglaju imali duplo više nezaposlenih u procentu u odnosu na Federaciju. Mislim to je jedan ovako po meni loš pokazatelj za našu zajednicu i da vidimo šta bi otprilike moglo da budu razlozi toga. Hvala.

**Predsjedavajuća Svjetlana Zamboni -Radovanović;** gospodin Ferić. Nema veze ima li ko, Vi ste se javili. Samo se Vi javite kada želite, a ja prozovem kada vidim ruku. Ravnopravan ste član kao i svi ostali, što dajete prednost bilo kome.

**Vijećnik Hajrudin Ferić;** ja sam pripremio ovdje nekoliko rečenica po ovoj Informaciji i zaista ću kao i predhodnici da pohvalim sadržaj ove Informacije i sve one zaista analitičke i statističke podatke koji su važni, relevantni za procjenjivati stanje obrta malog i srednjeg poduzetništva i zapravo htio sam upitati a evo i prodiskutovati činjenicu da je 09.09.2021.godine na Domu naroda

Federacije usvojen Zakon o obrtu i srodnim djelatnostima, da se on već počeo primjenjivati ovo pouzdano znam da Inspekcije već rade po njemu i da se o ovom Zakonu koji je u proceduri od 2015.-te godine dugo govori i on je konačno dobio svoj epilog, što znači, a sigurno i znam da su u Službi bili upoznati sa cijelim tokom od nacрта, prednacrtu pa do samog usvajanja o njemu. Važno je istaći da taj Zakon o obrtu i srodnim djelatnostima zaista kako i kažu predlagači uvode jednu revoluciju u ovoj oblasti koju bi evo po nekom mom shvatanju zaista trebalo da i mi ovdje usvojimo, razmislimo i pokušamo nešto u pravcu razvoja, prije svega obrta da učinimo u narednom periodu pogotovo bez obzira da li su to statistički ili neki drugi podaci govorimo da jeste epidemija na području općine Maglaj napravila jednu veliku štetnu posljedicu kad je u pitanju broj zaposlenih i mislim da je razvoj obrta, zanatstva, poduzetništva pogotovo tog mikro malog jedna od šansi razvoja općine Maglaj. Pa taj Zakon o obrtu kaže od tih novina, omogućeno je vanjskotrgovinsko poslovanje obrtnika. Po prvi put omogućeno obavljanje pojedine vrste obrta i bez stručne spreme, znači ukinuta je ono licenciranje poznato. Pri registraciji se prikuplja puno manje papirologije, znači obavezuje se da službenici pribavljaju dokumentaciju po službenoj dužnosti, nema više obaveza izdavanja obrtnice kao isprave, članarine obrtničke komore itd. su smanjenje sa 1 % na 0.5 od osnovice. Kad se govori o tradicionalnim, starim zanatima ministar će uz predhodno pribavljeno mišljenje jedinica lokalne samouprave, a u cilju očuvanja tradicije donijeti Uredbu kojom se utvrđuje popis tradicionalnih starih zanata, zatim piše u cilju očuvanja tih zanata vlade kantona i jedinica lokalne samouprave donose, odnosno mogu propisati olakšice i planirati sredstva za finansiranje projekata iz ove oblasti. Pa se govori o udruženjima obrtnika, obrtničkim komorama, da ja tu puno zaista ne oduzimam vremena, želim samo da sugerišem evo i da možda mi se malo pojasni. Znači, da stoji da taj Zakon koji se već primjenjuje da se pojedine odredbe konkretno kad su ti stari zanati da će se donijeti Uredbe u roku od 6 mjeseci i da će faktički kompletan i zakonski i podzakonski set akata biti da se primjenjuje. Ja sam htio da upitam pošto zaista ste vi u svojoj Informaciji naveli šta bi bilo dobro i potrebno da se donese, da se uradi da razvijamo biznis i obrt al mi nekako kad dođemo do lokalnog nivoa malo tu stane, malo dosta je u općini stvari uglavnom ste to jako dobro primjetili šta bi dobro bilo, šta su zahtjevi biznisa kada su u pitanju kanton i Federacija pa i međunarodne okolnosti, ali kad dođemo do lokalnog malo je to više u općini. Između ostalog samo pitam koliko je Služba spremna da provodi ovaj Zakon o obrtu u smislu i te brzine izdavanja rješenja i prikupljanja dokumenata, ali ne samo to, nego koliko može općinska administracija, mi kao Općinsko vijeće ili bilo ko drugi, prije svega govorimo o administraciji da li može u smislu neke promocije ovog Zakona da organizuje jedan ili više okruglih stolova ili edukativnih sastanaka sa zaista relevantnim autoritetima na području općine, da se što više ljudi upozna na kojima bi se na neki način obavezno pozivala djeca odnosno učenici pogotovo iz Mješovite srednje škole da dođu na te edukacije sa konkretnim primjerima i pojašnjenjima šta kako da se obrne. Dakle, dobro bi bilo da razmislimo o tome, da takođe malo više porazmislimo kojim bi eventualno mjerama preciznim i konkretnim poboljšati registraciju obrta u poljoprivredi zaista moramo tu svi da pohvalimo ove naše programe koje dobijamo kada je u pitanju poljoprivredna djelatnost na području naše općine, ali jako mali broj poljoprivrednika se usuđuje i odlučuje da registruje kao svoj obrt, a mislim da bi to bila kao dobra šansa sa nekim eventualnim dobro osmišljenim podsticajnim mjerama koje bi mi u nekom narednom periodu donijeli da i to uradimo. Također evo predlažem da se malo više povede računa o kućnoj radinosti i turizmu koji na području općine Maglaj može biti šansa razvoja od tog. Spomenut ću Start-up program kao jedan od dobrih programa kvalitetnih koji ulazi u to. Imamo šansi.

**Predsjedavajuća Svjetlana Zamboni -Radovanović;** vrijeme, vrijeme.

**Vijećnik Hajrudin Ferić;** evo ide..ja sigurno znam da su svi u situaciji da čujete kako neki roditelj ili komšije koji imaju stare članove porodice traže osobu za njegu itd. tih osoba i vrlo teško je naći takve osobe, ali evo i tu imaju neke šanse da se razmisli koliko se kroz tu vrstu socijalnog poduzetništva može da se uradi. Imam ovdje nekih konkretnih primjera, ali pošto me predsjedavajuća upozorava, ja bih predložio da mi, ne mora to biti kao zaključak al bih predložio da mi već u programu rada Općinskog vijeća za narednu godinu imamo jedan od tih prijedloga koji bi se zvao Operativni program razvoja obrta malog i srednjeg poduzetništva na području općine

Maglaj to može biti malo i Strategija, može biti i ja konkretno govorim o Operativnom programu jer toga sigurno znam, evo nemam vremena više da pričam, al ima tih olakšica i pogodnosti koje smo i kao Vijeće i administracija koje daje, nemamo ih nigdje na jednom mjestu, a sigurno sa jednim dobrim analitičkim razmišljanjem mogli bi kad bi gledali period od 2 ili 4 godine unaprijed mogli bi mi da dođemo do određenih rezultata u tom smislu.

**Predsjedavajuća Svjetlana Zamboni-Radovanović;** hvala vam lijepo. Evo kad bude i Prijedlog programa rada Općinskog vijeća Maglaj sugestija je bila namjenjena Službi, ali i Vi kao predstavnik političkog subjekta naravno da možete to predložiti. Replika? Hajd izvolite gospodine Galijaševiću.

**Vijećnik Firuz Galijašević-replika;** Moram reći samo dotaknut se par stvarčica, nije to ni neka replika, ni ne znam ni ja šta bih ni kako bih nazvao, ali ovi podaci koje ste Vi našli za broj zaposlenih, vjerujte da Federalni zavod za statistiku ne znam odakle vadi podatke. Ja sam pregledao broj nezaposlenih po svakom mjesecu jutros sam baš pregledao, po svakom mjesecu od januara od 2020-te do danas, ni jednom nisam našao da smo imali 3889 nezaposlenih, niti jednom. Broj zaposlenih 4311 kako oni kažu, ni to ne znam. Mi u ovom trenutku, ja možda na drugačiji način računam i pratim zapošljavanje na području općine Maglaj. Najbolji podatak za to je Porezna uprava. Porezna uprava jedina ima tačan podatak, koliko je zaposleno naših na području općine Maglaj.

**Predsjedavajuća Svjetlana Zamboni -Radovanović;** hoćete reći da je podatak u ovom materijalu pogrešan ili ovo što je gospodin Salatović iznio?

**Vijećnik Firuz Galijašević;** pa može biti i pogrešan i to. Ja govorim za nezaposlene. A podatak iz Poreske uprave je tačan 100%. 5080, jutros 5080, tu mi je ostao na stolu je tačan. A što se tiče ovih Podsticaja zapošljavanja Start-up juče je objavljen Javni poziv za ovaj Start-up za 2021.godinu. Tako da možete slobodno reći ovim mladim budućim poduzetnicima da se obrate našem Ferhatu za dalje.

**Predsjedavajuća Svjetlana Zamboni -Radovanović;** hvala lijepo, vrlo korisna informacija. Drago mi je da ste se javili za riječ gospodine Galijaševiću.

Jako smo ponosni na cifre. Evo izvolite gospodin Bradarić.

**Ferhat Bradarić;** prvo da vas sve pozdravim. Ja bih krenuo po redu kako su postavljana pitanja, znači gospodina Galijaševića vezano za ovaj tabelarni pregled. To je recimo jedna lijepa sugestija i nastojat ćemo naredne godine recimo kroz ovakav dokument da uradimo i tabelarni pregled na nivou općine za nekih recimo eto 5 godina po pitanju zaposlenih, kretanja zaposlenih, vanjskotrgovinski izvoz itd. Kada je u pitanju, pitanje gospodina Edina Salatovića, znači procentualno učešće koliko sam shvatio zaposlenih je veće u odnosu na druge općine u Federaciji za prošlu godinu, ovo su znači konkretni i egzaktni podaci, zvanični podaci iz zvaničnih institucija na nivou FBiH, znači, podaci koji su objavljeni od strane Federalnog zavoda za programiranje razvoja, Federalnog Zavoda za statistiku, Porezne uprave, Federalne Službe za zapošljavanje i Općinskih organa u dijelu gdje mi možemo da raspolažemo tim podacima. Porezna uprava je jednim dijelom nas opskrbila sa podacima koje oni mogu da daju, a podaci zvaničnih Federalnog zavoda za programiranje razvoja i Federalnog zavoda za statistiku su zvanični podaci koji se koriste na nivou Federacije i ova razlika koja se možda desi, to su vjerovatno podaci koji se odnose na naše nezaposlene koji se vode na evidencijama zaposlenih lica na radu u inostranstvu ili ljudi koji rade trenutno za neke kompanije koje su registrovane ili na nivou BiH znači konkretno iz drugog entiteta tako da ne možemo reći da su ovo netačni podaci, ovo su tačni i zvanični podaci. Kada je u pitanju Zakon o obrtu, on je objavljen danas u Službenim novinama FBiH i stupa na snagu osmog dana od dana objavljivanja. Mi smo već jutros njega uzeli da ga analiziramo, gledamo te razlike koje su u odnosu na prošli Zakon. Ja bih ovim putem pohvalio gospodina Kapića s kojim su imali strašnu jednu saradnju kroz ovaj period usvajanja ovog Zakona, jer je bio na Parlamentu i na Domu naroda. Za napomenu vama u postupku je donošenja novi Zakon o ugostiteljstvu koji će takođe imati daleko veće benefite za ugostiteljsku djelatnost u odnosu na postojeći Zakon, recimo i tu moram pohvaliti naše predstavnike u Paramentima na nivou

Federacije, jer je to naša direktna konekcija gdje mi možemo davati konkretne prijedloge, gdje mi prepoznajemo neke od stvari koje recimo nisu u interesu ugostitelja, u interesu naših poduzetnika, a koje se mogu uvrstiti u zakonsku regulativu da u ovom dijelu olakšamo. Ovaj konkretno Zakon o obrtu tačno nam daje mogućnost vanjskotrgovinskog poslovanja gdje će svi oni koji iskažu interes moći da svoje postojeće obrte ili ove koji već idu u registraciju da podnesu zahtjev za preregistraciju u tom dijelu da im se dozvoli znači registracija od strane carinskih organa u BiH i dobijanje carinskog broja, a to se odnosi znači da izvoze svoje proizvode i usluge i da uvoze repromaterijal za potrebe tih svojih obrta. Kada je u pitanju da li je Općina spremna, možemo reći 100% Općina je sposobna da odgovori ovom zadatku da sve ove postojeće obrte koje će oni morati da preregistruju u jednom datom periodu usklade sa ovim postojećim Zakonom o obrtu i ovi koji podnose zahtjev za bavljenje vanjskotrgovinskih djelatnostima da odgovori, rokovi su skraćeni na 7 dana, dio poslova ćemo morati završavati po službenoj dužnosti već smo razgovarali jutros sa gospođom Eldinom Mehinagić da neke stvari moramo dobivati i mi odmah u roku po pitanju recimo uvjerenje o državljanstvu, po pitanju uvjerenja o poslovnoj sposobnosti od Centra za socijalni rad što je konkretno u nadležnosti Službe za društvene djelatnosti, takođe gdje ćemo morati imati koordinaciju i po pitanju recimo podnosioca zahtjeva sa drugih općina koji su državljani FBiH, gdje ćemo morati po službenoj dužnosti takođe dobivati njihovo uvjerenje o državljanstvu. To su sve neka pitanja koja ćemo mi morati rješavati u datom trenutku, ovaj da bi mogli odgovoriti ovim zakonskim novim uvjetima, ali to nije nikav problem. Nije bio problem ni do sada tako da neće biti ni u ovom periodu. Kada je u pitanju obrt u poljoprivredi mi trenutno imamo 45 obrtnika registrovanih u poljoprivredi. Svake godine što je interesantno taj broj raste. Sve više naših ljudi koji registruju sebi poljoprivrednu djelatnost, plaćaju sebi poreze i doprinose, gdje mi tu možemo pomoći im, mi smo razgovarali na nivou Službe i s načelnikom i u narednom periodu, vjerovatno na nekim od narednih sjednica bit će Izmjena dopuna Odluke o komunalnim taksama. Moramo to izmijeniti po službenoj dužnosti zato što je u jednoj tački gdje su razdvojene privredne djelatnosti po Zakonu o računovodstvu i reviziji, to je stari zakon koji je bio na snazi od nekih 4-5 godina, a novi zakon je usvojen. Stari Zakon o računovodstvu i reviziji je razdvajao privredne subjekte na mala, srednja i velika preduzeća, novi Zakon o računovodstvu i reviziji prepoznaje mikro, mala, srednja i velika, pa ćemo morati napraviti novu klasifikaciju onih djelatnosti, koeficijente. Naš prijedlog je možda da i vi razmislite da poljoprivredne djelatnosti oslobodimo od plaćanja komunalne takse. Ona je u ovom dijelu vama za informaciju, oni su oslobođeni prve godine 100 %, druge godine 50%, 150 KM im je jedinstvena taksa na nivou godine. Šta je interesantno kada je u pitanju rad sa obrazovnim institucijama, mi možemo reći da smo prošle godine imali ovdje sastanak s učenicima Opće gimnazije po pitanju poduzetništva, registracije biznisa, to smo takođe predložili i Mješovitoj srednjoj školi da organizujemo sa učenicima srednjih škola jedna edukativna predavanja po pitanju implementacije, primjene zakona, kako registrovati biznis, kako napisati poslovni plan tako da možemo to da usvojimo kao neki operativni plan što ste vi predložili, svakako u ovom dijelu ja bih spomenuo da je naš Starter kojeg evo vi svake godine podržavate i povećavate taj iznos, jedna od tih mjera operativnog programa koje provodi Općina da se pomogne malom i srednjem poduzetništvu. Evo za informaciju, on je objavljen prije par dana i traje do kraja mjeseca, mislim da je 4 ili 5.10 krajnji rok za prijavu. Znači, vrlo je jednostavno, vrlo lahko mogu aplicirati za kvalitetna sredstva od strane Općine bez nekakvih posebnih ograničenja u odnosu na druge nivoe vlasti. Mislim da tu nema nikakvih problema, nije sporno ništa. Možda sam nešto preskočio, možda sam otišao previše u detalje, ali svakako možemo organizovati, Načelnik nam je dao otvorene ruke po tome da organizujemo i radionice po pitanju ne moraju to biti samo mladi, mogu to biti i ljudi i srednjih godina. Bez obzira na poduzetnike, mlad poduzetnik koji kreće prvi put u biznis. Novi Zakon o obrtu je uveo jednu novu prednost za ljude koji su u toj nekoj trećoj životnoj dobi, znači penzioneri da bez obzira na status penzije do sada je bilo da moraju biti ispunjeni uslovi da mora imati 65 godina, a a 45 godina staža ili po Zakonu o boračko invalidskoj zaštiti, ovaj novi zakon daje svim penzionerima pravo bez obzira da li je to naslijeđena penzija može obavljati tu djelatnost kao dopunsku i dodatnu, tako



da ima tih dosta benefita. Mi stojimo tu na raspolaganju za bilo kakve vaše prijedloge ili traženja, mi ćemo se naravno staviti na raspolaganje.

**Predsjedavajuća Svjetlana Zamboni -Radovanović;** vaš odgovor gospodine Bradariću je iscrpan kao i Informacija koju ste nam ponudili. Mislim da ste ne bih rekla riješili dileme, nego zapravo prihvatili sve iznesene sugestije koje su vijećnici ovdje imali za vašu buduću Informaciju, odnosno ono što bi se moglo naći u Programu rada Općinskog vijeća za narednu godinu, tako da nema razloga da neke konkretne prijedloge ovdje usvajamo. Predlažem da Informaciju primimo k znanju. Eto toliko.

## ZAKLJUČAK

14.1. Prima se k znanju Informacija o stanju obrta, malog i srednjeg poduzetništva na općini Maglaj;

### **Ad 15. 15.Prijedlog Odluke o dopunama Statuta Komunalnog javnog društva d.o.o. Maglaj**

**Predsjedavajuća Svjetlana Zamboni -Radovanović;** ovo je tačka s kojom se proširili današnji dnevni red. Na Općinsko vijeće došao je dopis KJD d.o.o. Maglaj u kojem traže dopunu Statuta. Na Kolegijumu smo malo i razgovarali o ovome. Informacija koju nudi materijal je sasvim jasna. Dakle nikakve sumnje nema o čemu se radi i zbog čega se danas nalazi na Općinskom vijeću. Dakle, obzirom da mi činimo 76% svojim udjelom, moramo dati saglasnost odnosno donijeti ovu Odluku i Emina samo da ja pročitam ovo što bi morao biti Prijedlog Zaključka prije same diskusije, dakle mi bi smo trebali dati saglasnost na Prijedlog Odluke o dopunama Statuta KJD d.o.o Maglaj, donosi se Odluka o davanju ovlaštenja punomoćeniku za zastupanje Općinskog vijeća Maglaj na Skupštini KJD d.o.o. Maglaj, te se ovlašćuje predsjedavajuća Općinskog vijeća Maglaj da odredi lice kao punomoćenika državnog kapitala da na Skupštini KJD d.o.o. Maglaj glasa ZA Odluku o dopunama Statuta KJD d.o.o. Maglaj.

Tako bi glasio Prijedlog zaključka na ovaj materijal.

Otvaram raspravu. Nema rasprave. Zaključujem raspravu, te ovakav Prijedlog zaključka i stavljam na glasanje. Ko je za ?

**Glasalo za :** Svjetlana Zamboni Radovanović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Aida Bašić ( A-SDA), Elvir Vehabović ( NBL) Pero Mamić(HDZ BH), Mustafa Bešić (SBB), Hajrudin Fermić (DF),

**Protiv :** Jasmin Begić(SDA)

**Uzdržani:** Adis Abdurahmanović, Eldis Kusur, Edin Osmić, Eldin Pehrat, Edin Salatović.(SDA), Gospodin Mirsad Bežić, gospodin Safet Jašić( SDA) su odsutni u momentu glasanja i gospodin Elvir Arnautović( SDP).

## ZAKLJUČAK

15.1. Daje se saglasnost na Prijedlog Odluke o dopunama Statuta Komunalnog javnog društva doo Maglaj;

15.2. Donosi se Odluka o davanju ovlaštenja punomoćeniku za zastupanje Općinskog vijeća Maglaj na Skupštini „KJD“ doo Maglaj, te ovlašćuje predsjedavajuća Općinskog vijeća Maglaj da odredi lice kao opunomoćenika državnog kapitala da na Skupštini „KJD“ doo Maglaj glasa za Odluku o dopunama Statuta Komunalnog javnog društva doo Maglaj.

**Predsjedavajuća Svjetlana Zamboni -Radovanović;** direktoru KJD čestitam na ovakvim projektima, ovo je pohvalno i kao projekat za zaštitu okoliša ,ali i naravno predviđa velike uštede u utrošku sredstava samoga društva.

### **AD 16. Prijedlog Odluke o davanju saglasnosti MZ Kopice za izgradnju spomen česme na dijelu k.č.broj 1367 K.O.Kopice**

**Predsjedavajuća Svjetlana Zamboni -Radovanović;** i o tome smo govorili na Kolegiju. Otvaram raspravu po ovom materijalu. Gospodin Kusur izvolite. Predsjednik Kluba SDA.

**Vijećnik Eldis Kusun** ; ja vas sve selamim evo na samom kraju. Ovo je fino sve ovdje napisano, ali sada vam ja govorim znači, mimo Kluba vijećnika SDA meni je žao što je ova tačka dnevnog reda opet uvrštena, jer ovdje vi većinom ne znate, imamo ovdje i osobe koje su direktno vezane, koje su iz Kopica i znaju. Jeste ono po papirima sve regulisano, sve je to uvedeno u propise, međutim ovdje se ne radi o problemu imovinsko-pravnih odnosa na način da to rješava MZ, nego su ovdje narušeni zbog ove spomen česme narušeni su međuljudski odnosi. Ja sam u startu, pošto sam porodično vezan za jednog od korisnika te parcele gdje se počelo raditi to spomen obilježje. Već je tu urađen jedan dio posla. Urađeni su potporni zidovi i u čitavo vrijeme osoba koja je 30 i kusur godina ulazila tim dijelom pristupnog puta na svoju parcelu, ovim činom, izgradnje ovog zida je to zatvoreno. Ovdje se kao što sam rekao radi o narušavanju međuljudskih odnosa. Ovdje je sve sada kada su narušeni međuljudski odnosi, kad kaprici ljudski nisu uspjeli. Ja sam pokušao, mene je i druga strana zvala, ja sam pokušao to balansirati. Rekao sam pošto su u pitanju porodični odnosi, ovaj drugi kaže neka ruši ovaj drugi iz kaprica svog ljudskog kaže napraviti ću. Meni je žao, ja ću biti otvoren do kraja, znači ovdje su se otvorili kaprici sada kada ovi kao fizička lica nisu uspjeli da dobiju dozvolu za gradnju zato što je to u vlasništvu Općine i pristupni je put, osoba druga koja se protivi tome prije nekih 20-tak možda i više dana podnijela zahtjev građevinskom inspektorcu Zijadu Džaferoviću da izađe na lice mjesta i da utvrdi da li su te radnje legalne, da li su ti prilikom izgradnje tog zida ušli u njegovu privatnu svojinu. Ne znam ja, nije mi poznato da li je do sada građevinski inspektor izašao. Kada je druga strana fizičkog lica vidjela da ne može da prođe tim putem kao fizičko lice, onda je uključila što je meni žao i mjesnu zajednicu i mjesna zajednica se uključila, a da nisu riješeni međuljudski odnosi između dviju strana. Po meni mjesna zajednica služi, to jeste povjereništvo trenutno da miri ljude koji žive tu. Taj problem između ovih, sticajem okolnosti porodično sam vezan opet ponavljam, traje već 30 i kusur godina ljudi nisu u dobrim odnosima i sad će danas Općinsko vijeće donijeti Odluku da se pravi na tom mjestu spomen česma, hajr česma. Ako neko hoće da uloži svoj kapital, ovo ne ulaže mjesna zajednica, ovo ulaže pojedinac, ali se prikrilo preko mjesne zajednice. Ako neko hoće da napravi hajr, ja nemam ništa protiv spomen česme, hoću da se snimi. Mislim treba to podržavati, ali ako neko hoće hajr da napravi i da uloži sredstva, a da neko bude nezadovoljan zbog tog hajra mislim ovdje se pravi veliki problem i ja sam govorio i u jednom momentu sreli smo se priznat će predsjednik Kluba Mirza, gospodin Mirza Mešić i sreo sam predsjednika SDP-a gospodina Jasminka Kapića i ukazao sam prije 10-tak dana na ovaj problem i to je na Kolegiju skinuto da bi danas pod pritiskom neću da imenujem, znači pod pritiskom određenih grupacija ova tačka se opet stavila na dnevni red, a da nisu riješeni međuljudski odnosi i bojim se kad se donese ova Odluka poznavajući drugu stranu, da će biti tu većih problema, eto. Belaj će biti.

**Predsjedavajuća Svjetlana Zamboni Radovanović**; gospodin Delić.

**Vijećnik Fikret Delić**; ja ću malo biti glasnjiji pošto su ovi mikrofoni slabiji od predsjedavajuće. Nisam mislio izlaziti što se tiče ove tačke dnevnog reda jer nisam puno ni upućen al znam o čemu se radi, nisam ispitivao ništa. Imam osjećaj da sam prozvan. Ako iko treba ovdje za govornicu što se tiče ove tačke dnevnog reda govoriti to bi trebao neko iz Kopica. Prije par godina možda 3-4 godine, 3-4 čovjeka su isto doveli vodu u centru sela, ostavili su hajr spomen česmu, najmanje 100-tinu mještana dolazi na tu spomen česmu, nikom ne brane. Služba je odradila svoje, imovinsko-pravni odnosi su riješeni 100% znači, to nema nikakve prepreke. Ne brani nikog to je koliko sam upućen znam mjesto gdje se radi, ali za neku dobrobit koliko sam upoznat čovjek je uložio oko 20.000 maraka, doveo vodu, napravio bazen i hoće to da bude kao hajr voda, spomen česma. Eh sada da li neko, ali imovinsko-pravni odnosi su riješeni, to je zemljište Općine, ne vidim razlog nikakav da bi mogao biti kakav spor. Eh sada da li tu ima nekih nesuglasica oko komšija ili ne znam ni ja čega u to neću da ulazim, a što se tiče ove česme koja će tu biti koja će se graditi, koja je u završnoj fazi to je zemljište koliko znam nizašto. Čovjek je napravio zid potporni, planirao evo došlo na Vijeće da se odobri, podržat ću što ne bih. Ako gore 100-tinu ljudi dolazi, koristi i provjerite to u centru sela, sad će imati i na autobuskoj stanici dole česmu fino, neće biti smeća, tu je nekada smeće bacalo. Sad će biti uređeno, lijepo. Eto toliko od mene, ali mislim da nije uredu da ja pričam o Domisllici, Čobama i ne znam ni ja i kojoj mjesnoj zajednici ako nije

upućen. Treba svu istinu ovdje iznijeti za govornicu i reći. Kada pođeš pričati reci sve, iznesi kako jeste, a ne pola a onda pola ostane.

**Predsjedavajuća Svjetlana Zamboni Radovanović;** gospodin Kusr.

**Vijećnik Eldis Kusr;** meni je žao što će bezazalna tačka dnevnog reda ispasti nešto. Upravo me je kolega kojeg ja zaista uvažavam optužio i rekao da lažem. Rekao sam znači, parcela ta, ljudi međuljudski odnosi su narušeni, ja samo govorim. Ovo što govori gospodin Fikret, ja sam Fikrete ako ne znaš u početku kad je krenulo osoba koja investira me je nazvala da pokušam riješiti između njih dvojice međuljudske odnose. Ja sam fino sjeo u auto, pošto to je drugi koji se protivi od moje žene dajdža, da budem direktan. Otišao i sa njim razgovarao i on je rekao da hoće samo da oni sruše taj zid koji su uradili i da mi ostave moj put koji sam ja koristio 30 i kusur godina. Ja nisam iz Kopica, oženjen sam odozgo, ali ne može mi niko zabraniti da ovdje za govornicom pričam o bilo kojoj mjesnoj zajednici zato što su svi građani kao i ostalim vama dali glasove u svim mjesnim zajednicama. Drugo meni je žao što se kolega Fikret Delić pravi naivan i krije se iza toga kad si čitavo vrijeme i ti uključen u to, tako da nemojte ovdje, ja samo upozoravam i vas je druga strana koja želi da napravi tu spomen obilježje zvala kontaktirala, obećali ste da ćete to podržati, pritiskom je urađeno i vraćeno je ovo danas na dnevni red. Pričamo istinu. Ja nemam ništa protiv spomen česme, hvala Bogu kad ima takvih ljudi koji hoće da ulaže svoja sredstva za raznorazne hajrate od projekata, česama itd. itd. Međutim, ja samo govorim da je ovdje prije nekih 20-tak dana predat zahtjev građevinskom inspektoru, čovjek se konstantno buni da izađe inspektor i utvrdi stanje i ne znam da li je izašao. Evo uporno se hoće da se to provuče nazor i ja samo govorim, međuljudski odnosi su narušeni i više dalje ne ulazim, smatram da ćemo donošenjem današnje Odluke napraviti štetu.

**Predsjedavajuća Svjetlana Zamboni -Radovanović;** Bešić.

**Vijećnik Mustafa Bešić;** evo ja se moram malo uključiti što se tiče ovog predmeta. Ja sam sa Eldisom sada na pauzi razgovarao po pitanju toga. Mene čini sretnim ako nekome pomognemo da to bude sve uredu. Mene su kontaktirali ja sam vama rekao imena par ljudi iz Kopica da vidim mogu li šta riješiti, pomoći. Kažu nemam nikakvih problema, ima uredna papirologija sve. Meni je žao da ja nekom iskvarim al stvarno zvalo me više osoba i rekao sam vam i imena. Kaže čovjek je uložio privatno 12.000 KM evo ja pričam šta mi je čovjek rekao, preko 12.000 maraka i sada to stoji. Ide i zima da se to napravi. A evo sada po ovim pričama krivo mi je i žao ako mi to iskvarimo al Bože moj ako je sve u ovom papiru uredu, ima policija i sud pa neka riješava. Da li je ovo validan papir, dobili smo ovdje pa ima zakon neka riješava dalje. Meni je ponuđeno ovdje ovo da je ovo ispravno. Inspekcija ima isto. Stvarno mi je žao da iskvarimo nešto ako nije uredu.

**Predsjedavajuća Svjetlana Zamboni -Radovanović;** gospodin Jašić;

**Vijećnik Safet Jašić;** gledajte, ovo je blago rečeno od strane gospodina Kusura. Gore su odnosi dobro zategnuti i iz dosadašnjih odnosa te dvije porodice nije stanje dobro. Iznositi informacije kako su sve dozvole dobivene za izgradnju ove česme, koje ja ne znam kako ćemo je zvati jer zaista jedan čovjek to ulaže. Svi ovi pozivi koji su bili prema gospodinu Bešiću i ja sam imao tih poziva, jer ja sam familijarno vezan, s druge strane imam prijatelje u toj drugoj familiji i mene su zvali. Ali su sve zvali ovi ljudi iz porodice čovjeka koji je ovo počeo da radi. Nema niko ništa protiv te izgradnje česme ili bilo čega što doprinosi za nešto lijepo ili korisno itd. Tako i ova česma. Sjetite se moje diskusije ovdje kad sam govorio o onome asfaltu koji je izašao metar i 20 na glavni put. Mirza ti to dobro znaš, dolazio si gore i u Komisiji si za saobraćaj, metar i 12 je asfalt na asfaltu u tom dijelu se počinje graditi, zapravo ta česma je praktično izgrađena. Počinje se graditi ta česma jedno naspram drugog. Znači, ugrožen je saobraćaj, pješaci, djeca koja idu u školu itd. Rekao sam nemam ništa protiv izgradnje česme, ali to ova lokacija u putnom pojasu lokalnog puta koji je trebao da bude regionalni i mislim da nije to ni mjesto za tu česmu. U bližem okruženju na tom našem autobuskom stajalištu ili okretanju ima toliko mjesta. Imaju ovi koji ulažu ova sredstva, ima toliko mjesta da se ova česma smjesti da se ovo ne dira jer ovo nije samo ugrožen čovjek i prilaz kući, nije sigurni budite. Svi smo ugroženi. Evo neka izađu ljudi i vide da to ne priliči tu. Rješenje kompromisno, ponavljam ja nisam protiv ovoga, ja sam za svaku gradnju. Imamo odmah kod oglasne table ondje ima prostora koliko želite što nije uopće daleko, to nije

nekih 20-30 metara. Ova česma odmah je ispod kuće čovjeka koji to gradi. Ja stvarno nemam ništa, samo me čudi otkud se pojavila sada mjesna zajednica i to je familijarna veza, iskoristili su momka koji je povjerenik trenutno ja ga ne krivim, možda nije znao. Ja bih volio da vidim prije svega znači, nisu riješeni imovinsko-pravni odnosi, međuljudski odnosi su zategnuti ako jesu riješeni gospodin Delić je rekao da su riješeni, ako su riješeni ja nemam ništa protiv. Neka kažu ljudi evo dobili smo urbanističku suglasnost, a da bi dobio tu suglasnost moraju biti riješeni imovinsko-pravni odnosi i da ljudi ne odsjeku jedan drugom glavu. To je zaista usijana situacija, ja vas molim da malo o ovome razmislimo evo imamo neko kompromisno rješenje i ovo je vlasnik Općina gdje ja predlažem da se ta česma napravi, neka bude kakva god hoće.

**Predsjedavajuća Svjetlana Zamboni -Radovanović;** jel ti i investiraš?

**Vijećnik Safet Jašić;** ne investiram ja, evo ako treba ja ću dati svoj prilog. Kod nas nikad nije problem skupiti sredstva za tako nešto, jer kod nas se ljudi odazivaju na sve akcije. Hoću da kažem nešto drugo, zašto da ugrožavamo sami sebi saobraćajnicu ako imamo na istoj praktično lokaciji prostor za to. Evo ja garantujem da neće niko reći, čak će reći svaka čast. To ja samo govorim. Ne bih volio da se naljuti ni jedna strana na mene. Mene nije zvala ova druga strana.

**Predsjedavajuća Svjetlana Zamboni -Radovanović;** ne znam ja ni ko je jedna, ni ko je druga strana, ne zanima me. Doktor Vehabović je tražio riječ. Hajmo Safete ako ima Prijedlog zaključka ako nema..

**Vijećnik Safet Jašić;** ja sam vama predložio drugu lokaciju da svi budemo zadovoljni i mi da nas ne boli glava.

**Predsjedavajuća Svjetlana Zamboni -Radovanović;** hajmo o materijalima govoriti. Šta me briga za odnose među ljudima gore, između njih dvojice.

**Vijećnik Safet Jašić;** ako je postavljena česma, šta sad još nešto treba da se gradi. Prema tome jel se to hoće još više ugrožavati putna komunikacija. Slažem se da sam prekoračio vrijeme al nemojte tako olako prelaziti preko nekih stvari. Ja ovdje nemam nikavog interesa osim ovog što sam rekao.

**Predsjedavajuća Svjetlana Zamboni -Radovanović;** hvala lijepo, doktor Vehabović

**Vijećnik Elvir Vehabović;** moram opet pročitati tačku dnevnog reda. Prijedlog Odluke o davanju saglasnosti MZ Kopice za izgradnju spomen česme na dijelu k.č.1367 K.O.Kopice

Ovdje mi trebamo donijeti Odluku o saglasnosti, da li je nešto zakonito ili ne. Hipotetski nemojte me sada pogrešno shvatiti, ja sam protiv izgradnje jarbola ovog sada što se hoće graditi. Šta ? Hoćete sada vi zaustaviti gradnju jarbola, zato što je Elvir Vehabović protiv nečega, hipotetski. Hoćemo sada zaustaviti izgradnju. I uvijek će se naći pojedinac koji je protiv nečega, hoćemo li sada zaustaviti sve. Evo ja sam protiv jarbola, hoćemo sada zaustaviti svu proceduru i sve i reći evo ima Elvir Vehabović, jer on smatra da to ne treba tu da stoji.

**Predsjedavajuća Svjetlana Zamboni -Radovanović;** hvala lijepo. Ja bih samo pozvala da svako radi svoj posao, ako postoji problem oko nečega neka institucije kažu svoje, ja bih stavila materijal na glasanje. Stavove ste iznijeli i sasvim su jasni, dakle zaključujem raspravu i na glasanje stavljam Prijedlog Odluke o davanju saglasnosti MZ Kopice za izgradnju spomen česme na dijelu k.č.1367 KO Kopice na glasanje. Ko je za ?

**Glasalo za :** Svjetlana Zamboni Radovanović, Mirza Bradarić, Fikret Delić, Jasmin Đuhera, Samir Fetić, Firuz Galijašević, Mirza Mešić, Arif Mujkanović, Almin Smailović, Senad Šehić( SDP), Hajrudin Ferić (DF), Elvir Vehabović ( NBL) Pero Mamić(HDZ BH), Mustafa Bešić (SBB),

**Protiv :** Adis Abdurahmanović, Eldis Kusur, Edin Osmić, Eldin Pehrat, Edin Salatović, Jasmin Begić,Safet Jašić( SDA)

**Uzdržani:** Aida Bašić ( A-SDA)

Vijećnik Mirsad Bejić (SDA) i Elvir Arnautović(SDP) u momentu glasanja nisu bili prisutni.

**ZAKLJUČAK**

16.1. Usvaja se Odluka o davanju saglasnosti Mjesnoj zajednici Kopice za izgradnju spomen-česme na dijelu k.č.br. 1367k.o. Kopice;

**Predsjedavajuća Svjetlana Zamboni -Radovanović;** zaključujem diskusiju po dnevnom redu za današnju sjednicu Općinskoga vijeća, te otvaram dio namijenjen vijećničkim pitanjima i inicijativama. Evo dopredsjedavajuća će preuzeti ovaj dio.

**Vijećnik Firuz Galijašević;** imam vijećničku inicijativu Kluba vijećnika SDP-a. Klub vijećnika SDP-a pokreće vijećničku inicijativu za izmjenu Statuta Općine Maglaj. Pošto sam to već jednom čitao, ja ću predati ovako da vam ne smetam.

**Dopredsjedavajuća Aida Bašić;** gospodine Mešić, izvolite.

**Vijećnik Mirza Mešić;** ja ću prvo ovo vijećničko pitanje koje sam podnio 18.05.2021.godine, a nisam dobio ni jedan odgovor samo ću priložiti ovdje. Vijećničko pitanje se odnosi da li su izdate sve potrebne dozvole za poslove točenja naftnih derivata koji se već godinama toče/sipaju za potrebe samo jedne firme u Ulici 1.Marta na autobuskoj stanici? Kolika je količina(zapremina) tankera(cisterne koja je ukopana u zemlju) koja se nalazi uz samu zgradu autobuske stanice?

Obrazloženje neću da čitam, čitao sam već jednom.

Drugo je vijećnička inicijativa koja se odnosi na izmjenu dijela Regulacionog plana u MZ Kosova koji je na snazi možda već i više od 10 godina, a građani su mi se obratili jer imaju problem ne mogu da riješe imovinsko-pravne odnose, a taj Regulacioni plan se ne koristi, jer nije urađen stvarnim izlaskom na teren. To sam uradio uz konsultacije sa Službom i to ću da predam da ja sada ne čitam zašto i šta, ukratko sam rekao koji je problem.

Sljedeća vijećnička inicijativa koji je problem već isto građani traže od mene da rješavamo taj problem odnosi se na prolaz ispod puta M 17 u blizini osnovne škole u Kosovi gdje ne radi rasvjeta, a đaci koji su najčešći korisnici to koriste. Imali smo problem gdje su i migranti jedno vrijeme tu bili i ulazili i ostavljali otpad itd. Znači, tu inicijativu sam uputio i na Službu našu ovdje i na JP Ceste Federacije BiH, odnosno Doboj putevi Doboj Jug koji vrše održavanje. Još jedna inicijativa isto se odnosi na MZ Kosova na trotoar koji je urađen prošle ili pretprošle godine, ne mogu tačno se sjetiti uz M17, spada u nadležnost Cesta Federacije, sam napisao da je potrebno upravo iz sličnog razloga kao i za ovaj podhodnik ovamo da se uradi Projekat za rasvjetu i sama rasvjeta na toj dionici, jer najčešći korisnici su tog dijela ceste djeca koja idu u školu svakodnevno pješke i prelaze na toj dionici kolovoz, pa sam uputio inicijativu da se uradi Projekat za rasvjetu i sama rasvjeta.

**Dopredsjedavajuća Aida Bašić;** hvala Mešiću, Đuhera izvolite.

**Vijećnik Jasmin Đuhera;** dopredsjedavajuća meni je kolega Elvir Arnautović ostavio svoje pitanje pa ako je moguće da pročitam poslije svojih inicijativa.

Prvu inicijativu upućujem prema Ministarstvu prometa i komunikacija ZDK i Kantonalnoj direkciji za ceste.

Ovim putem molim navedene institucije da poduzmu mjere na sanaciji pješakog dijela mosta Begova ćuprija, već nekoliko mjeseci pješački most koji vodi prema Osnovnoj školi Novi Šeher, se nalazi u katastrofalnom stanju. Svakodnevno stotine učenika prolazi tim mostom i očigledno je da se treba dogoditi neka tragedija da bi neka institucija nešto poduzela na sanaciji ovog mosta. Lično sam upoznat sam koliko je povjerenik MZ Novi Šeher uložio napora kontaktirajući nadležno Ministarstvo, Direkciju za ceste i preduzeće koje je zaduženo za održavanje regionalne ceste. Do dana danas niko ništa nije konkretno poduzeo na rješavanju ovog problema. Stoga apelujem na sve relevantne faktore da poduzmu konkretne radnje na rješavanju ove problematike, kako bi naša djeca bezbjedno pohađala nastavu.

Drugu inicijativu upućujem prema Komisiji za bezbjednost saobraćaja Općine Maglaj.

Da se razmotri mogućnost postavljanja sigurnosnog saobraćajnog ogledala na raskrsnici u naseljenom mjestu Novi Šeher na lokaciji Gornja mahala u neposrednoj blizini trgovačke radnje Mobilax.

Adekvatnim postavljanjem sigurnosnog saobraćajnog ogledala povećala bi se preglednost vozačima koji se iz Gornje mahale uključuju na lokalni put Novi Šeher- Čobe. Na toj lokaciji vozači se suočavaju sa otežanim uključivanjem na lokalni put, iz razloga što su stambeni objekti

izgrađeni uz samu saobraćajnicu. Iz tog razloga najbolje rješenje za bezbjedno uključivanje na saobraćajnicu je postavljanje sigurnosnog saobraćajnog ogledala. Apelujem na Komisiju za sigurnost saobraćaja da razmotri mogućnost postavljanja istog.

Sada ću pitanje od kolege Arnautovića. On je adresirao pitanje na Dom zdravlja Maglaj.

**Vijećnik Elvir Arnautović;** Velik broj naših sugrađana, nezadovoljnih korisnika usluga zdravstvene zaštite ističe uskraćena prava na slobodan izbor i samoodlučivanje, zbog nemogućnosti ostvarivanja prava na zdravstvenu zaštitu koja podrazumijeva konsultativne specijalističke preglede kao i bolničko liječenje u Kantonalnoj bolnici Zenica. Pacijentima, a posebno osiguranim licima od čijih plaća se mjesečno uplaćuju doprinosi za zdravstveno osiguranje nije ostavljena nikakva mogućnost da po slobodnom izboru ostvare najmanje, a to je pravo na odabir zdravstvene ustanove bolnice u kojoj će primati zdravstvene usluge/bolničko liječenje kao i specijalističke preglede/čak ni unutar kantona kojem teritorijalno pripadaju.

Ugovor koji je sklopio Dom zdravlja Maglaj sa Zavodom zdravstvenog osiguranja ZDK o konsultativno-specijalističkim pregledima i bolničkom liječenju krši osnovno načelo pravičnosti zdravstvene zaštite, jer su građani bukvalno primorani da se liječe u Općoj bolnici Tešanj, a da ih o tome predhodno niko nije niti pitao niti obavještavao.

Nemali broj slučaja je da pacijente u bolesnom stanju vrate iz Kantonalne bolnice Zenica na liječenje u Opću bolnicu Tešanj, jer po Ugovoru oni nisu nadležni za pružanje bolničkog liječenja. U svemu ovome najviše trpe bolesnici odnosno nedužan narod.

Zbog svega navedenog, od JU Dom zdravlja Maglaj tražimo da preduzme sve potrebne aktivnosti i mjere kojim bi se našim pacijentima omogućilo pravo na pravično i pravedno liječenje, odnosno na odabir ustanove u kojoj će biti liječeni.

**Dopredsjedavajuća Aida Bašić;** hvala, Kusur izvolite.

**Vijećnik Eldis Kusur ;** ja imam dvije inicijative i jedno pitanje. Znači, konkretno prva inicijativa. Tražim od Općine Maglaj da pokrene aktivnosti sa nadležnom Elektroprivredom bila to HZHB ili Elektroprivreda BiH da se rješava problem u snabdjevanju električnom energijom naseljenog mjesta Domislica. Česti su prekidi u napajanju električnom energijom naseljenog mjesta Domislica, jer je trenutna trafo stanica slabija i usljed većeg opterećenja dolazi do prekida u snabdjevanju električnom energijom ovog naseljenog mjesta, a najčešće se to dešava za vrijeme Ramazanskog bajrama ili Kurban-bajrama. Znači, bude veliko opterećenje i evo pošto je kod nas stalna redukcija, nismo riješili problem vodosnabdjevanja kada dođe voda u 6 ili 7 ili 8 sati znači žene ili domaćinstva uključe mašine i neku noć se desilo da je nestalo struje dva puta. Pozivam općinsku administraciju, to jeste pokrećem inicijativu da se konačno počne riješavati ovaj problem, Druga inicijativa tiče se, nju sam već postavio nekad ranije, ali evo ponovo.

Pokrećem inicijativu za sanaciju i rekonstrukciju asfaltnog puta Novi Šeher- Domislica, tako što će se sanirati bankine, izvršiti popravku asfalta gdje su oštećenja na putu, izvaditi kanale.. Da se izvrši sanacija i rekonstrukcija makadamskog puta Domislica- Brezove Dane-Beše- Lugovi, jer zaista gore imamo povratnike koji žive i iznad Domislice, to jeste nekih 100-tinjak metara žive i stanovnici hrvatske nacionalnosti koji svaki danom prolaze tim putem, a put je u katastrofalnom stanju bar do trenutka asfaltiranja da se ti dijelovi puta naspu određenim nasipnim materijalom i sanacija makadamskog puta Domislica- Belele-Čobe, i dio puta prema Bešama, to jeste prema groblju gdje svakodnevno stanovnici hrvatske nacionalnosti obilaze svoje najmilije koji su u ukopani u tom groblju.

I vijećničko pitanje tiče se, ja sad već postavljam možda i predsjedniku Komisije za saobraćaj, gospodinu Mirzi. Interesuje me, to jeste u čijoj je nadležnosti i na čiju inicijativu se postavljaju znakovi tipa DOBRODOŠLI/ SRETAN PUT ili prosto naziv općine u čije granice se ulazi?

Općine u susjedstvu imaju ove znakove.

Jer na izlasku iz Kosove ima znak DOBRODOŠLI u općinu Tešanj, tako i kad se izlazi iz Oruča prema Koprivcima ima znak DOBRODOŠLI u općinu Tešanj. Tako kada idemo prema Zavidovićima, izlaska iz Bočinje piše DOBRODOŠLI u Zavidoviće i isto kod IM transporta piše DOBRODOŠLI u Žepče. I mi iskreno iz Novog Šehera nikakav znak nemamo prilikom ulaska u Novi Šeher, da li se ulazi na prostore općine Maglaj ili smo još u Žepču. Eto to je to.

**Dopredsjedavajuća Aida Bašić;** hvala gospodine Kusur, doktor Vehabović.

**Vijećnik Elvir Vehabović;** pokušat ću usmeno, a dostavit ću i pismeni odgovor na postavljeno pitanje za JU Dom zdravlja Maglaj. Činjenica jeste da pogotovu u ovoj zadnjoj godini postoji problem u zbrinjavanju pacijenata sa područja Maglaja. Nažalost, zadnje dvije godine mi samo dobijemo bez ikakvih predhodnih razgovora od strane Zavoda ugovor da potpišemo na mail i da im vratimo dva potpisana primjerka u roku od 14 dana. Ukoliko ne potpišete te primjerke ne dobijete tranšu novca za funkcionisanje bez ikakvih pitanja šta želimo i da li želimo. Pošalju nam ugovor na mail u propisanom roku i imamo 14 dana da potpišemo i eto. Nažalost, mi smo donosili predhodne zaključke na tim sjednicama gdje smo isticali problematiku da pacijent kada ode u Tešanj jeste njihov, nije njihov. Kada ode u Zenicu isto tako. Preklapanja oni nešto između sebe i donosili smo zaključke da se formiraju Komisije koje će to određivati. U međuvremenu stvoren je veliki dug navodno bolnice Tešanj prema bolnici Zenica i oni su jedni druge tužili i sada je tu njihov rat ko će koga pobijediti. Nažalost ispaštaju pacijenti jedni drugi između ostalog i pacijenti sa područja općine Maglaj jer je to na sudu. Navodno je bolnica Tešanj dužna novac bolnici Zenica, zato što su ovi u njihovo ime pružali usluge koje je trebalo da pruža bolnica Tešanj, a ovi to ne priznaju i to je sve sada na sudu. Odlukom direktora bolnice Zenica se ne primaju pacijenti za te usluge, primaju se za ove, a nažalost ispaštaju pacijenti. Znač , sve je na nekakvom nivou, ne gleda se pacijent ako se nešto desi ne znam ko će da snosi odgovornost, ja sam rekao i svojim ljekarima i svima da gledaju da idu u korist pacijenta, a ovi neka imaju hrabrost da ga vrata. Ako se nešto desi da se zna da je bio u bolnici i da je vraćen, a sve ostalo znači je do njih i njihove međusobne komunikacije, jer izgleda da ne mogu naći zajednički jezik. Ponavljam, nažalost zadnje dvije godine dobijamo samo ugovor na potpis bez opcije, jer se potpisuje ugovor od predhodne godine bez mogućnosti da mi utičemo na taj ugovor. Znači, daju nam rok, pošalju ugovor na mail i ukoliko ne potpišemo taj ugovor nećemo dobiti tranšu novca.

**Dopredsjedavajuća Aida Bašić;**hvala, gospodin Abdurahmanović.

**Vijećnik Adis Abudrahmanović;** ja imam jednu vijećničku inicijativu, a radi se o sljedećem.

S obzirom na dugogodišnje probleme u vezi kvalitetnijeg snabdjevanja električnom energijom cijelog naseljenog mjesta Kosova, te učestale prekide u isporuci električne energije, ranijom inicijativom Vijeća MZ započeta je aktivnost na instalaciji dvije trafostanice i to „Kosova brdo“ i „Kosova društveni dom“ koje još nisu u funkciji. Naime trafo „Kosova brdo“ radi, ali ne u punom kapacitetu zbog neinstalirane opreme, a trafo „Kosova dom“ i pored završene dokumentacije i izdatih dozvola čeka nalog za izvođenje radova.

S obzirom na slab napon u ovim područjima, a zbog nadolaska zimskog perioda u kome su učestali prekidi, pokrećem inicijativu da općinske strukture zatraže urgentno završavanje poslova na ova dva trafoa. Imam još dva pitanja. Da li Općina Maglaj ima potpisan ugovor o održavanju ulične rasvjete, ako ima, kada je potpisan, sa kojom firmom i pod kojim uvjetima?

Naime, određena grupa građana mi se obratila i informisala me da su više puta prijavljivali kvar, ali bezuspješno tj. nitko nije izašao na teren da bi popravio kvar.

Također u Novom Šeheru lokacija prodavnica Mobilax, prema Čobama i Gornja Mahala, duži vremenski period nije radila ulična rasvjeta (više puta prijavljivano), da bi naposljetku kvar popravili građani u svojoj režiji. I još jedno pitanje. S obzirom da je danas četvrtak, postavljam vijećničko pitanje, da li danas u MZ Kosova radi ured matičara. Imajući u vidu da je službeni radnik duži vremenski period bio odsutan (bolovanje), matični ured u MZ Kosova je bio zatvoren. Da li postoji mogućnost da u ovakvim slučajevima kad je službenik odsutan, da iz Službe pošalju zamjenu? Hvala.

**Dopredsjedavajuća Aida Bašić;** hvala, gospodine Jašić izvolite.

**Vijećnik Safet Jašić;** ja sam na 6. redovnoj sjednici postavio vijećničko pitanje, a radi se o lokalnom putu Novi Šeher- Kopice i nisam nikad dobio odgovor, niti je po tom pitanju šta se uradilo. Radilo se o tome da se pokosi trava, trava više ne raste više ni bitno. Propalo vijećničko pitanje. Na ovom istom putu postoje velika oštećenja. Odgovorno vam tvrdim 17 godina je kako je put završen nikad nisu ni kanali vađeni, nikad nije ništa rađeno na tom putu i put je trenutno u katastrofalnom stanju. Ima odrona, rupa, provalija da ne kažem drugačije. Ima podrobljenih

propusta, cijevi itd itd. moje vijećničko pitanje kada i na koji način bi se mogla očekivati rekonstrukcija, ali je zaista neophodna rekonstrukcija ovog puta. I drugo pitanje imam. Član sam Udruženja pčelara i vi znate u kakvom je stanju pčelarstvo. Ljudi su me zamolili jer stvarno u teškoj situaciji su pčelinja društva i jutros je otišao zahtjev prema Federalnom ministarstvu i zamolili su me ljudi da se takođe i ovdje traži pomoć. Ja ovom prilikom ne pitam za pomoć Općinu Maglaj, ja znam kakve su naše mogućnosti nego radi se o poticaju koji pripada za poljoprivredu, a konkretno za pčelarstvo jer prošle godine smo dobili nešto umanjen, nije bitno dobili smo nije za kukanje. Ova godina je možda i najteža za pčelare i eto da vidimo otprilike u proteklom periodu je bilo 11 maraka po košnici, pa eto ja pitam koliko bi to moglo biti ove godine za poticaj u pčelarstvu. To su ta dva vijećnička pitanja koja ja imam.

**Dopredsjedavajuća Aida Bašić;** hvala gospodine Pehrat .

**Vijećnik Eldin Pehrat ;**evo iako su moji predhodnici govorili o nekim stvarim ja ću pročitati ono što sam pripremio. Dakle imam dvije vijećničke inicijative. Prva se odnosi na hitnu rekonstrukciju puta kroz naseljeno mjesto Novi Šeher i to u ulici „Hasana Brkića“(od kuće Sijahović Bahrudina do kuće Meškić Adema).

Na navedenoj dionici postoje oštećenja koja dovode do velikih problema za vozače, pa s tim u vezi veliki broj njih mi je sugerisao upravo na ovaj problem. S obzirom da se radi o dijelu puta koji je najprometniji na cijelom novošeherskom kraju, hitna rekonstrukcija istog je i više nego potrebna.

Kako sam informisan, komisija je obilježila dio koji bi se trebao sanirati, međutim do realizacije nikad nije došlo. Zbog sve većeg nezadovoljstva građana, apelujem da već u narednim danima , nadležni poduzmu aktivnosti po ovom pitanju.

I drugo je rješavanje problema ulične rasvjete u Novom Šeheru, podnosim inicijativu za stalnim održavanjem ulične rasvjete u Novom Šeheru, a na zahtjev stanovnika ulice „Gornja Mahala“. Naime, ova ulica je u mraku bila oko 2 mjeseca, nakon čega je kvar na uličnoj rasvjeti otklonjen zahvallujući nekolicini odgovornih građana. Kako su mi saopštili, stanovnici su se u nekoliko navrata obraćali nadležnim, od kojih nisu dobili nikakav odgovor. S tim u vezi zahtjevam stalno održavanje uličnih rasvijeta u svim ulicama u Novom Šeheru.

**Dopredsjedavajuća Aida Bašić;** hvala, gospodin Salatović

**Vijećnik Edin Salatović;** moje vijećničko pitanje se odnosi na postavljanje jarbola na sjevernom ulazu u grad Maglaj .Pitanje glasi koliko je sredstava izdvojila Općina Maglaj za izgradnju istog?

Naime na društvenim mrežama vidimo da se uključuju pravna i fizička lica u ovu akciju, ali do sada nisam vidio koliki iznos je Općina Maglaj izdvojila. Kako se radi o jednom projektu koji je od velike važnosti, smatramo da Općina treba uzeti maksimalno učešće u ovom projektu.

**Dopredsjedavajuća Aida Bašić;** hvala gospodine Salatoviću i ja imam inicijativu.

**Vijećnica Aida Bašić;** inicijativu podnosim nadležnom Ministarstvu i nadležnim općinskim službama. Radi se o sljedećem. Cestovna dionica u Ulici Hasana Brkića u Novom Šeheru, općina Maglaj, koja ujedno predstavlja i dio regionalne ceste Novi Šeher-Hatkine Njive-Kamenica- Teslić je jedina putna komunikacija koja spaja prostor Općine Maglaj sa povratničkim mjestima Kamenica, Rajševa i drugim mjestima na području općine Teslić i dalje, te navedenim povratničkim bošnjačkim mjestima predstavlja jedinu putnu žilu kucavicu prema općini Maglaj i FBIH. Također, još je važnija njena lokalna uloga kao jedine putne komunikacije koja povezuje naseljena mjesta Maglajske općine: Novi Šeher, Čobe, Gornja Domislicu, Kopice, Dubrave sa gradom Maglajom. Kao takva predstavlja najprometniju dionicu novošeherskog kraja općine Maglaj, kako za vozila tako i za pješake, te bilo kakvi zastoji i otežavajuće okolnosti prometa ovom dionicom dovode do ogromnih problema i ugrožavanja bezbjednosti saobraćaja kako ljudi tako i motornih vozila koja saobraćaju navedenom dionicom. Trenutno stanje na opisanoj dionici koja predstavlja dio Ulice Hasana Brkića u Novom Šeheru je katastrofalno, jer je usljed kretanja mnoštva putničkih i teretnih motornih vozila došlo do oštećenja asfaltnog kolovoza u vidu velikih ulegnuća i ispupčenja asfalta, te velikih udarnih rup na istom, koji onemogućavaju i normalno odvijanje saobraćaja. Iz navedenog razloga su česte saobraćajne nezogde i incidenti na navedenoj dionici, koji dovode do usporavanja i otežanog saobraćaja, te ugrožavanja materijalno tehničkih dobara i pješaka. S tim u vezi predlažem usvajanje općinske inicijative za asfaltiranjem navedene



dionice Ulice Hasana Brkića u dužini od oko cca 50 metara, koja se proteže od križanja navedene Ulice Hasana Brkića i Ulice Kovači, tj. od TR „Mima“ i TR „Šeherka“ na navedenom križanju pa dalje Ulicom Hasana Brkića u smjeru Kopica, općina Maglaj u dužini od oko cca 50 metara. Radi se o relativno jako maloj dionici i veoma malim finansijskim sredstvima za njenu popravku, a čija bi realizacija doprinjela ogromnom podizanju nivoa saobraćajne sigurnosti i olakašavanju kretanja vozila i pješaka. Takođe su nemjerljivit benefiti pozitivnog subjektivnog doživljanja lokalne populacije, koja već desetak godina čeka navedenu popravku i asfaltiranje navedene dionice, te su prisutni svakodnevno negativni komentari na račun vlasti koja do sada nije imala sluha za navedeno.

**Dopredsjedavajuća Aida Bašić;** ima još Bešić.

**Vijećnik Mustafa Bešić;** Evo ovako goreći problemi, moje kolege i mještanim Eldis Kusur, ali i ja moram napomenuti te stvari, pitanje vodosnabdjevanja naseljenog mjesta Domislica ovdje se vrti možda 10-15 godina. I svake skoro sjednice to mi je jedan od prioriteta da sam potencirao da je jedan od najvećih problema. Uz to i rješavanje električne energije. Kada se desilo ovo što je Eldis iznio, moram se nadovezati ja sam odmah zvaao šefa poslovnice Antolović Zorana u Novom Šeheru i sutradan smo se našli. Znači, pola sata sam bio s momkom koji je dolazio kod trafo stanice. znači, dva puta nam je iskočila. Nedovoljno za naše naseljeno mjesto Domislica. Našao sam ga ovdje pred Općinom Maglaj i kažem mu, Zorane daj te sjedite više riješite koliko sam puta dopis slao i Eldis i ja. Stvarno se trudimo da riješimo. To je osnovna stvar ljudska da imamo struju i vodu. Plaćamo uredno i želimo da imamo uredno ono što plaćamo. Kaže mi Zoran ovom prilikom Beša, evo govorim ovdje u kameru imate 200 domaćinstava u naseljenom mjestu Domislica u HZHB je prijavljeno 15 porodica. On meni to priča i sad se ja pitam jesmo mi taoci dvije Elektroprivrede. Nas to uopšte ne interesuje. Plaćamo uredno i hoćemo da imamo struju. Sad šta je rješenje. Ja ne vidim ovdje stvarno rješenje na ovaj način. Ovdje moraju se uključiti viši nivoi da se pitaju Novog Šehera, nije samo o Domislici riječ. Čovjek mi kaže imamo samo 15 u Domislici od 200 koji plaćaju u HZHB-u. Šta sada trebamo mi uraditi. Mi možemo Eldise ovdje beskonačno govoriti, ali mi ćemo svaki put imati isti problem. Meni je žao, mene srce zaboli kao i tebe kada nam nestane struje i nemamo vode, ali možemo pričati beskonačno, neko treba s viših nivoa da sjedne i dogovori se. Mi smo nemoćni. Žao mi je stvarno što to do sada nije riješeno.


**Dopredsjedavajuća Aida Bašić;** hvala Bešiću, gospodine Osmiću izvolite.

**Vijećnik Edin Osmić;** Ponovo podnosim inicijativu za rješavanje problema dolaska gradske pitke vode za naseljeno mjesto Liješnica. Ovu sam inicijativu već podnosio i nisam dobio odgovor. Molim da mi se dostavi pisani odgovor.

**Dopredsjedavajuća Aida Bašić;** ima li još neko? Nema. Zatvaram 8.redovnu sjednicu.

Sjednica završena u 13:45h.

Zapisničar  
Elza Gračić



PREDSJEDAVAJUĆA  
Svjetlana Zamboni-Radovanović